

唐文粹補遺

和
338
20



利
291
20

東京書目
學校圖書

唐文粹補遺目錄卷第二十

書 牋附 啟附

與睦州獨孤使君論朱利見書 李觀

與張宇侍御書 前人

報弟兌書 前人

與柳子厚書 劉禹錫

答柳子厚書 前人

從樊漢南為鹿門處士求修墓牋 符載

上河東公啟 李商隱

上河東公第二啟 前人

上裴相公啟 溫庭筠

江南論鄉飲酒禮書 劉蛻

與高錫望書 孫樵

與王霖秀才書 前人

新錢表
有胸

司空圖

貽王進士書

羅隱

答賀蘭友書

Blank columns for text on the right page.

唐文粹補遺卷第二十

吳江 郭麐 祥伯 纂
英山 金勇 仁甫 校

與睦州獨孤使君論朱利見書

李觀

觀絜身復古立行師古臨事不惑見危必進秉此數節時人罕知
伏惟良寶匿瑕明鑑含垢暫留頃刻少納芻蕘遂厥愚懇死而無
悔竊見前此邑丞朱利見一室窮病十年非辜形神沮弱容鬢衰
颯若遣憂能傷性此人殆不久生孤禽孺子相向嗚咽習井壞竈
其之淒涼觀雖非比齒稍與同道往往目覩感之酸然常恨莫能
為計無所施力使有穀帛當能賑之此生亦人倫之落落士林之
楚楚代習禮樂宿傳衣纓乃祖乃父亦有拾青拖紫三徵五辟者
也生家亡早孤年壯方仕所共交結亦皆名流微班不達直道來
累人不哀者諒誰有心觀與此生非有半面故素一夕優狎非有
斗筲之惠杯酌之好但私心助痛借口為言昔荆軻徇燕丹之急

聶政答嚴遂之字故載籍不朽以為美談且數子者良有由緣今之所論有異於此况觀輒以翩翩賤質曾為使君翦拂瓌瑑薄伎復忝使君盼睐寄家樂土日聞盛事竊見信有所未洽恩有所未周安敢坐同碌碌不以陳述伏惟使君大其量深其懷使儒衣之士復罄心腹幸甚幸甚觀早窺典墳見古賢良居五等之位設六條之政所以察刑獄詢諍訟褒善懲惡恤勞勸分是以名彰王府勳潤史筆豈可備員已矣尸祿悠哉故漢宣帝云與我共理者其惟良二千石且自使君下車數載田疇始闢桑柘初拱人識廉恥邑無逋亡當朝談其美列岳讓其最雖文翁化蜀伯道理吳二侯既歿惡為絕倒獨有南冠朱利見氣衝牛斗間使君嚴如雷電慈如太陽何不修慎終之德解懸絕之命使仲由之諾不墜長孺之灰更然則流芳一時垂範千載且此人窮窶於原婁污辱於韓范悽惶於蔡澤憔悴於屈平整冠而綏斷斂衽而肘露猶矻矻耽學依依固窮常戴使君殊造對孤枕流涕日者有故壽昌沈尉周

行之未識量非常知事有廢興人有進泰承使君咳唾拯此人溝壑朱生不幸沈子云亡顧茲塵昧可為悲想夫處大官者威貴能斷權尚從宜綸釣淹滯篳埽譏懸即言者得盡意疑者獲自明使君垂彤襜佩朱紱丈夫之雄也凡所措捨豈不易哉朱利見餘負亦可以為力敢望周旋不棄特達庶之是所望也頃聞歙州長史羅士詹亦朱利見同類當時刺史劉公獨降大惠羅士詹不盈一稔旋踵西歸利見當時幽繫會不側息莫非羅生與倜儻之士會朱生受肅殺之氣偏嗟夫三尺之童子為之恨恨且宇內所注淪濫官其中有附跡權門處陰勢路則官遣得雪祿都免收有損朋黨之私挾貞介之操則繫銅至弊名器被誣豈不為至主上無及溜之臣羣小得鼓刀自割也觀士梗微物竊所不幸英雄之人曷以為意曩聞孔璋薦表代李北海死曠古之後先王所嘉觀誠駑怯恆羨高躅執事之議欲將如何使君不疾爾臧否則朱生索於枯魚之肆矣嘗見古人持危救傾率克有益使君豈不知此子不

爲食駿之士盜襲之夫人不易知知人則哲伏惟審念之然此人年五十鬱有詞藻義必致命性頗輕財乃俠少之流也居官直而簡與友信而敬乃百古人之次也蕭蕭健筆喋喋利觜環坐之先也凡今之人惡直醜正入門自媚邪道苟容故有貝錦首章青蠅獨弔觀雖輒舒紙染翰輕陳肺腑無任情激不敢諛羈屑之士進趣益難書發之日出柴扉東面再拜傾耳聽音倍深兢戰

與張宇侍御書

李觀

觀受性不敏言事務直侍御幕府俊選屬城具瞻不腆之書深冀開覽觀年十有八再忝鄉薦身未入洛家猶寄吳心惟使氣性不偶合仗前輩奇節振窮居清操天下之事能傾腹心不但以董生下帷蘇子刺股而已觀於還瀆遁跡向歷數歲蓬戶卻掃侍親之側其志未果屈躬增修竊見有被注淪濫官朱利見前任此邑丞腐儒孤官纔受三命無賴令吏前削除名銜裂其冠冕奪其祿利亡家既久求食無所危於累卵急於倒懸如何聖朝有厥濫罰每

一念此悲涕交注觀比有一書上此州獨孤使君先論朱利見續以古今事爾時獨孤公尺書見招知已相遇緩躡珠履偕升蘭堂飽之以嘉餼醉之以芳醕特賞才調且憐義聲仍謂觀曰見足下高作奇之又奇良深覲容敢不承命其所上獨孤公書兼錄呈上惟少披覲明不虛耳頃者韓相國臨十數州殺人不問罪自用若無上晝聚冤氣夜啼枉魂人人畏威莫敢諷議今尙書領藩翰之任抱澄清之志視民如子龔上若父寄公耳目固宜竭誠伏見太陽炎赫砂礫焦鑠旱魃作厲農夫憂饑直爲囚繫無辜之所致也雖欲禱桑林焚巫尪亦將奚及不如疎決滯獄速宥疑罪則歲稔國富不期而至觀所說是方伯政本非豎儒之譚執事之人用收采否如理以爲當言之可行請馳一介之使問三徑之客卽荷衣蕙帶以趨下風必謂狂簡終不惠顧則退臥岩藪俟有知己翹足仰望以聽指南

報弟兌書

李觀

六年春我不利小宗伯以初誓心不徒還乃於京師窮居讀書著文無闕日時是年冬復不利見小宗伯嗚呼天難諶命難言聖人且猶盤桓我安得如料而決志哉但堅節不去躁機不來兢兢而強勉勉而爲耳於時顧逆旅而無聊圖俟時而尙遐發能遷之慮緘莫知之嗟乃以其明年司分之月乘罷驢出長安西遊一二諸侯求實於囊往復千里投身甚難殊不知西陲數州界在虜關土塞門民獷榮戰陋儒我見其將遣我縵胡我見其士賦我從軍向之謀暨感激心卒無所開祇忽一念我家如在長安或過適戍而宿隨登陴而望有東方之人老在塞下者爲我言用兵之勤及五十年每歲孟秋邊風便寒達於堅冰武夫操戈僵不得煦胡兵類戮寇罔於常方言會候人舉烽我茫然謂戎來遂夜歸長安窮處蕭條猶初乃開而居乃出而書上不敢偶下不敢專鄙苟得之名謝姑息之交愚與介并直與誦違是用人不合余余不合人故身有負俗之議文多自我之非然斯者略不損明其猶荆民不譽宋

王臧倉之疑孟軻及我而三奚足屑哉然特苦旦暮之供出處之虞也而幸有一僕賃之童純義而誠服事祇勤傭蓄以給余爲隸以奉余久而不求直殆而不施勞盤飧之廉汗馬之庸不能過焉古者孔子門人皆曰上賢及在阨窮有愠見者吾老君亦有從者徐甲老君去官甲亦求去夫孔老之道於我也則小大較然其門人從者之操則何遠斯童哉吁我嘗獨歌而悲客有造曰子之窮達在時與人我曰不在時乃在人不在人乃在斯童何者仲尼適周魯君乃與一乘車兩馬一豎子自周而還其道益明則聖人經爲亦用其資獨作恆人乎今我所以能於京師保窮居讀書著文無廢日時者乃斯童之力也非我之能也非親交骨肉之力也成我洪名階我青雲有日矣汝知之乎汝我季也我空言哉吾違養以來不忘歸歸而無名爲親之羞困而行之窮苦日尋俛而自安窮則可也流親之羞歸不可也念二途日夜腐心渾元循環三歲一朝油然而思眾恨長短居人遊人相屬之憂寧同時哉行至八

月天地凄然葉下西郊我在空房晨起吟咏聞乎無人夜臥不寐
寒漏自長意可覆也難可縷陳我書不稀汝書亦新異日兩至同
慰一身豈不旨哉年不甚幼近學何書擬舉明經為復有文明經
世傳不可墮也文貴天成不可彊高也二事並良苟一可立汝擇
處焉無乃不修繫書黃耳依依有遺千萬孝弟其兄云云

與柳子厚書

劉禹錫

閒發書得筆郭師墓誌一篇以為其工獨得於天姿使木聲絲聲
均其所自出抑折愉釋學者無能如繁休伯之言薛訪車子不能
曲盡如此能令鄙夫冲然南望如聞善音如見其師尋文寤事神
驚心得倘伴伊鬱久而不能平嗟夫郭師與不可傳者死矣茲張
柱差枵然貌存中有至音含糊弗聞噫人亡而器存布方冊者是
已予之伊鬱也豈獨為郭師發耶想足下因僕書重有慨耳不宣
禹錫白

答柳子厚書

劉禹錫

禹錫白零陵守以函置足下書爰來屑末三幅小章書僅千言申
申疊疊茂勉甚悉相思之苦懷膠結贅聚至是泮然以銷所不如
陪言者亡幾書竟獲新文二篇且戲子曰將子為巨衡以揣其鈞
石銖黍予吟而繹之顧其詞甚約而味淵然以長氣為幹文為支
跨躒古今鼓行乘空附離不以鑿柄咀嚼不有文字端而曼苦而
腴佶然以生癰然以清予之衡誠懸於心其揣也如是子之戲子
果何如哉夫矢發乎羿毅而中微存乎它人子無曰必我之師而
後我衡苟然則譽羿者皆羿也可乎索居三歲俚言燕而不治臨
書軋軋不具禹錫白

從樊漢南為鹿門處士求修墓牋

符載

廬山山人符載頓首頓首死罪夫仁義揚顯朗德之充也惠慈被
幽味仁之原也竊見故鹿門孟處士浩然納靈含粹伏儒傑立文
寶貴重價吞連城一旦殞落門允陵蔑吁嗟邱隴頽陷荒圃形或
異斧高不及隱永懷若人行路慨然前日辨覺佛寺峴首亭恭觀

明公垂意拳拳將墓文表隨封起窀穸閭境搢紳警聞嘉聲風動
興感偕至踴躍然垂休務當時從善貴流今閣下外追軍旅程使
之劇內勞賓客俯仰之勤牽耗星歲未遑指顧嘗恐旦夕飛踐廊
廟纏綿深旨鬱紆不寫則處士之風流精爽沉翳厚地矣或好事
者乘而射之孤負夙志矣伏惟閣下醇仁盛德覆乎草木除惡彰
善發於鄉黨割省庶務疑神晷刻盼睐官屬望則疑首尾實足以
副士林之翹翹慰羈魂之真真事關教化不主名譽伏惟慮之始
終之幸甚幸甚

上河東公啟

李商隱

商隱啟兩日前於張評事處伏覩手筆兼評事傳指意於樂籍中
賜一人以備紉補某悼傷以來光陰未幾梧桐半死方有述哀靈
光獨存且兼多病眷言息允不暇提攜或小於叔夜之男或幼於
伯喈之女檢庾信荀娘之啟常有酸辛詠陶潛通子之詩每嗟漂
泊所賴因依德宇馳驟府庭方思效命旌旄不敢載懷鄉土錦茵

象榻石館金臺入則陪奉光塵出則揣摩鉛鈍兼之早歲志在元
門及到此都更敦夙契自安衰薄微得端倪至於南國妖姬叢臺
妙伎雖有涉於篇什實不接於風流况張懿仙本是無雙曾來獨
立既從上將又託英寮汲縣勒銘方依崔瑗漢庭曳履猶憶鄭崇
盪復河裏飛星雲閒墮月窺西家之宋玉恨東舍之王昌誠出恩
私非所宜稱伏惟克從至願賜寢前言使國人盡保展禽酒肆不
疑阮籍則恩優之理何以加焉干冒尊嚴伏用惶灼謹啟

上河東公第二啟

李商隱

商隱啟某聞周朝貝葉列妙引於王褒梁日枳園灑芳詞於沈約
必資乎鴻筆麗藻刻乎貞金翠珉然後可以充足人天發揮龍象
苟其曖昧卽匪莊嚴爰託亨塗夙聞妙喻雖從幕府常在道場猶
恨出俗情微破邪功少二日斷酒有謝蕭綱十一年長齋多慚
王真仰戀東閣未歸西林近者財俸有餘津梁是念適依勝絕微
復經營伏以妙法蓮華經者諸經中王最尊最勝始自童幼常所

護持或公幹漳濱有時疲薊或謝安海上此日風波恍惚之閒感
驗非少年于此州長平山慧義精舍經藏院特創石壁五間金
字勒上件經七卷既成勝果思託妙音伏惟尚書有夫子之文章
備如來之行願不逢惠遠已飛廬岳之書未見簡棲便制頭陀之
頌是故右繞三匝仰希一言庶使鷲殿增輝龍宮發色流傳沙界
震動風輪報恩于蓮目果脣奪美于江毫蔡絹伏希道念特降神
鋒瞻望旌幢攜持礎斧曝身晞髮以候還辭無任懇迫之至謹啟

上裴相公啟

温庭筠

某啟聞效珍者先詣隋和蠲養者必求倉扁苟無懸解難語奇功
至於有道之年猶抱無辜之恨斯則沒為癘氣來撓至平敷作冤
聲將垂不極此亦王公大人之所慷慨義夫志士之所歎歎某性
實顯蒙器惟頑固纂修祖業遠愧孔琳承襲門風近慚張岱自頃
爰田錫寵鏤鼎傳芳占數遼西橫經稷下因得仰窮師法竊弄篇
題思欲紐儒門之絕維恢常典之休烈俄屬羈孤牽軫藜藿難虞

處默無衾徒然夜歎修齡絕米安事晨炊既而羈齒侯門旅遊淮
上投書自達懷刺求知豈期杜摯相傾臧倉見嫉守土者以忘情
積惡當權者以承意中傷直視孤危橫相陵阻絕飛馳之路塞飲
啄之塗射血有冤叫天無路此乃通人見愍多士具聞徒共興嗟
靡能昭雪竊見元宗皇帝初融景命遽惻宸襟收拭瑕疵申明枉
結劉丞相導揚優詔蘇許公潤色昌譽五十年閒風俗敦厚逮及
翔泳未安其所雨暘不得其和匹夫匹婦之吁嗟一聚一鄉之幽
鬱欲期昭泰必仰陶鈞某進抱疑危退無依據暗處囚拘之列不
沾渙汗之私與煨燼而俱捐比昆蟲而絕望則是康莊並軌偏哭
於窮途日月懸空獨郭於豐蔀伏以相公致堯業裕佐禹功高百
姓咸被其仁一物不違於性倘或在途興嘆解彼右驂彈劍有聞
遷於代舍瞻風自卜與古為徒此道不誣貞明未遠謹以文賦詩
各一卷率以抱獻縑緗儉陋造寫繁蕪干冒尊高無任惶灼

江南論鄉飲酒禮書

劉蛻

昨日送貢士堂上得觀大禮之器見蠶豆破折尊孟穿漏生徒倦
怠不稱其服賓主向背不習其容嗚呼天下所以知尊君敬長小
所以事大者抑非其道乎天下之用其道不過於一日尚猶偷惰
如此況天下尊君敬長能終日者乎是以朝廷時誅不順鄰里日
起紛爭固當然也夫布衣匹夫始則用其道自達故化耕稼而王
侯化陶漁爲公卿其變化不測若此然而一旦居上位既不預興
俯拜揖之事尙不能素嚴有司時閱其威儀乎嗚呼則蛻謂王公
大人耆老衰罷固當然也然而有擊踣稽首於髡褐之前畏敬戒
慎有終日不敢嗜酒殺不敢近妾婦者其于誣惑之道尙能去其
情自去之術則不能一日勤其容唯王公大人無慚髡褐乎髡褐
尙能自大其法王公大人反以其道信之乎卽其奉髡褐能速化
其耕稼陶漁者則髡褐者可以有土地而制王公大人矣是不知
升平科者不由夷狄言遷乎資者不由髡褐授昭然柰何哉抑
不知孔子之道如商君乎以其法自敝也伏惟閣下務敕有司按

諸禮圖修其器服戒將事而隳者時訓習之毋使每歲臨事而隳
其容幸甚幸甚蛻再拜

與高錫望書

孫樵

文章如面史才最難到司馬子長之地千載獨聞得揚子雲唐朝
以文索士二百年間作者數十輩獨高韓吏部吏部修順宗實錄
尙不能當孟堅其能與子長子雲相上下乎足下乃小史尙宜世
嗣史法矧足下才力雄獨意語橫闊嘗序義復罔及樂武事其說
要害在樵宜一二百言者足下能數十字輒盡情狀及意窮事際
反若有千百言在筆下足下齒髮未及壯其所得如此則不知子
長子雲當足下年齒時文章果何如也然足下所傳史法與樵所
聞者異耶古文有直事俚言者有文飾者乃特紀前人一時語以
爲實錄非謂俚言奇健能爲史筆精魄故其立言序事及出沒得
失皆字字典要何嘗以俚言汨其閒哉今世俚言文章謂得史法
因牽韓吏部曰如此如此樵不知韓吏部以此欺後學耶韓吏部

亦未知史法耶又史家紀職官山川地理禮樂衣服亦宜直書一時制度使後人知某時如此某時如彼不當以禿屑淺俗別取前代名品以就簡絕又史家條序人物宜存警訓不當徒以官大寵濃講文張字故大惡大善雖賤必紀尸位浪職雖貴必黜至如司馬遷序周繆班孟堅傳蔡義尚可用耶爲史官者明不顧刑辟幽不愧神怪若梗避於其間其書可燒也古者國君不得視史今朝廷以宰相監修大丈夫當一時寵遇皆欲齊政房杜躋俗太平孰能受惡於不隱乎古者七十子不與筆削今朝廷以史館叢文士儒家擅一時胸臆皆欲各任憎愛手出白黑孰能專門立言乎樵未知唐史誠何如也樵雖承史法於師又嘗熟司馬遷揚子雲書然才韻枯梗文過平質嘗序廬江何易于首末千言貴文則喪質近質則太禿刮垢磨痕卒不能到史獨謂足下才力天出最與史近故以樵所受於師者致足下

與王霖秀才書

孫樵

太原君足下雷賦逾六千言推之大易參之元象其旨甚微其辭甚奇如觀駭濤於重溟徒知褫魄眙目莫得畔岸誠謂足下怪於文方舉降旗將大誇朋從聞且疑子雲復生無何足下繼以翼旨及雜題十七篇則與雷賦相闕數百里足下未到其壺則非樵所敢與知既入其域設不如意亦宜上下銖兩不當如此懸隔不知足下以此見嘗耶抑以背時戾眾且欲哺粕啜醢以苟其合耶何自待則淺而徇人反深鸞鳳之音必傾聽雷霆之聲必駭心龍章虎皮是何等物日月五星是何等象儲思必深摛詞必高道人之所不道到人之所不到趨怪走奇中病歸正以之明道則顯而微以之揚名則久而傳前輩作者正如是譬玉川子月蝕詩楊司城華山賦韓吏部進學解馮常侍清河壁記莫不拔地倚天句句欲活讀之如赤手捕長蛇不施控騎生馬急不得暇莫可捉搦又似遠人入太興城茫然自失詎比十家縣足未及東郭目已極西郭耶樵嘗得爲文真訣於來無擇來無擇得之於皇甫持正皇甫持

正得之於韓吏部退之然樵未始與人言及文章且懼得罪於時今足下有意於此而自疑尚多其可無言乎樵再拜

貽王進士書

司空圖

辱示製述甚非所宜敢不以所說陳於左右哉楚宋交怨而使在其間宋人有得玉於其境者遇楚使適至誇示之楚人謀沮其玉請先譽於宋國既獻宋果怒曰玉產於吾土而價張於吾仇是欺我也不果售今吾守道固窮且竊文章之譽是邪競沽虛者之所仇嫉者吾子之才固奇矣乃以所質實於吾懷是玉者未適於市而噪者已盈於門矣必曰不投知於司空氏必曰不受知於司空氏則雖吾子之奇必足速得志於時矣舍是無他術也所貺益腆不敢發柙幸詳其意勿冒時之所忌

答賀蘭友書

羅隱

前者吾子不以僕之暗鈍猥垂教示大相開發若非許與深至誰肯如是甚善甚善然其所道者正中僕嘗所自病者也僕少而羈窘自出山二十年所向摧沮未嘗有一得幸於人故同進者忌僕之名同志者忌僕之道無有不如吾子之所誨也然僕之所學者不徒以競科級於今之人蓋將以窺昔賢之行止望作者之堂奧期以方寸廣聖人之道可則垂於後代不可則庶幾致身於無愧之地寧復虞時人之罪僕者與夫禮貌之於人去就流俗不可以不時其進於秉筆立言扶植教化當使前無所避後無所遜豈以吾道沉浮於流俗者乎仲尼之於春秋懼之者亂臣賊子耳未聞有不亂不賊者疑仲尼於筆削之間況僕求試京師隨波而上逐隊而下亦有年矣家在江表歲一寧觀旨甘所資桂玉之困何嘗不以事力于人苟利其出處則僂俛從事亦人之常情也在不枉其道而已矣道苟不枉以之流離可乎冠衣不能移人之跡顧所履何如耳言不忠行不信謂之君子可乎言忠而行信謂之小人可乎吾子視僕復苟合於不信不忠者乎非僕之不可苟合道義之人皆不合也而受性介僻不能方圓既不與人合而又視之如

仇讎以是僕遂有狹而不容之說吾子果復發言及此是不以眾人見待也而今而後敢不安其所自然一科一級多難也有如是哉彼山也水也性之所適也而眷眷不去者以聖明之代文物之盛又安可以前所忌者移僕初心苟不得已僕亦自有所處大凡內無所疾外無所媿則在乎命也天也焉在僕與時人乎惟吾子勿憚相規之數也

唐文粹補遺卷第二十

唐文粹補遺目錄卷第二十一

孔補闕集序 張說

孟浩然集序 韋縠

春秋統例序 啖助

國秀集序 芮挺章

文編序 元結

通典序 李翰

獨孤常州集序 李舟

五經文字序例 張參

岑嘉州集序 杜確

穆公集序 許孟容

兵部郎中楊君集序 權德輿

魏國公貞元十道錄序 前人

唐故漳州刺史張君集序 前人

唐文粹補遺目錄卷二十一

唐文粹補遺卷第二十一

吳江 郭麐 祥伯 纂
英山 金勇 仁甫 校

孔補闕集序

張說

唐會稽孔季翊字季和識真之士也弱冠制舉授校書郎轉國子主簿年三十一卒於左補闕祖紹安中書舍人考楨絳州刺史季和清規素業有奕代之訓依仁遊藝其聖者之後永昌之始接跡書坊有廣漢陳子昂鉅鹿魏知古高陽許望信都杜澄昌樂谷倚廣陵馬懷素東萊王無競河南元希聲臨淄李伯魚譙國桓彥範僉謂季和神清韻遠析理探微衛叔寶之比也嗚呼人斯云亡世闕多故十年之外零落將盡而後來者皆首華金步鳴玉負璽丹地揮毫紫宸何嘗不拜職之日歎在劉王喬臨壇之時恨無謝益壽者矣頃見許州之子風裁可觀潘子之門有尼夏侯之學傳建集作者五卷以示予稱從弟四人皆良器愴相如之遺草幸公業

之不一因敘曩意存之編首云爾

孟浩然集序

韋 緝

宜城王士源者藻思清遠深鑒文理常遊山水不在人間著亢倉子數篇傳之於代余久在集賢常與諸學士命此子不可得見天寶中忽獲浩然文集乃士源為之序傳詞理卓絕吟諷忘疲書寫不一紙墨薄弱昔虞坂之上逸駕與駑駘俱疲吳竈之中孤桐與樵蘇共爨過伯樂與伯喈遂騰聲於千古此詩若不遇王君乃十數張故紙耳然則王君之清鑒豈減孫蔡而已哉余今繕寫增其條目復貴士源之清才敢重述於卷首謹將此本送上祕府庶久而不泯傳芳無窮

春秋統例序

啖 助

孔子修春秋意以為夏政忠忠之敝野商人承之以敬敬之敝鬼周人承之以文文之敝僿救僿莫若忠夫文者忠之末也設教於本其敝且末設教於末敝將奈何武王周公承商之敝不得已用之周公沒莫知所以改故其敝甚於二代孔子傷之曰虞夏之道寡怨於民商周之道不勝其敝故曰後代雖有作者虞帝不可及已蓋言唐虞之化難行於季世而夏之忠當變而致焉故春秋以權輔用以誠斷禮而以忠道原情云不拘空名不尚狷介從宜揀亂因時黜陟古語云商變夏周變商春秋變周而公羊子亦言樂道堯舜之道以擬後聖是知春秋用二帝三王法以夏為本不壹守周典明矣又言幽厲雖衰雅未為風逮平王之東人習餘化苟有善惡當以周法正之故斷自平王之季以隱公為始所以拯薄勉善揀周之敝革禮之失也

國秀集序

芮 挺章

昔陸平原之論文曰詩緣情而綺靡是彩色相宣煙霞交映風流婉麗之謂也仲尼定禮樂正雅頌采古詩三千餘什得三百五篇皆舞而蹈之弦而歌之亦取其順澤者也近祕書監陳公國子司業蘇公嘗從容謂芮侯曰風雅之後數千載間詞人才子禮樂大

唐文粹補遺卷二十一
二五
壞諷者溺于所譽志者乖其所之務以聲折為宏壯勢奔為清逸
此蒿視者之目聒聽者之耳可為長太息也運屬皇家否終復泰
優游闕里惟聞子夏之言惆悵河梁獨見少卿之作及源流浸廣
風雲極致雖發詞遺句未協風騷而披林擷秀揭厲良多自開元
以來維天寶三載謫蕪穢登納菁英可被管弦者都為一集芮
侯即探書禹穴求珠赤水取太沖之清詞無嫌近澗得興公之佳
句寧止擲金道苟可不棄於廝養事非適理何貴於膏梁其有
巖壑孤貞市朝大隱神珠匿耀剖巨蚌而寧周寶劍韜精望斗牛
而未獲目之縑素有愧遺才尚欲巡采風謠旁求側陋而陳公已
化為異物堆案颯然無與樂成遂因絕筆今略編次見在者凡九
十人詩二百二十首為之小集成一家之言

文編序

元結

天寶十二載漫叟以進士獲薦名在禮部會有司考校舊文作文
編納於有司當時叟方年少在顯名跡切恥時人詔邪以取進姦

亂以致身徑欲填陷奔於方正之路推時人於禮讓之庭不能得
之故優游於林壑快恨於當世是以所為之文可戒可勸可安可
順侍郎楊公見文編歎曰以上第汚元子耳有司得元子是賴叟
少師友仲行公公聞之諭叟曰於戲吾嘗恐直道絕而不續不虞
楊公於子相續如縷明年有司於都堂策問羣士叟竟在上第爾
來十五年矣更經喪亂所望全活豈欲跡參戎旅苟在冠冕觸踐
危機以為榮利益辭謝不免未能逃命故所為之文多退讓者多
激發者多嗟恨者多傷閔者其意必欲勸之忠孝誘以仁惠急於
公直守其節分如此非救時勸俗之所須者歟叟在此州今五年
矣地偏事簡得以文史自娛乃次第近作合於舊編凡二百三首
分為十卷復命曰文編示門人子弟可傳之於筐篋耳叟之命稱
則著於自釋云不錄時大曆二年丁未中冬也

通典序

李翰

儒家者流博而寡要勞而少功何哉其患在於習之不精知之不

明入而不得其門行而不由其道何以徵之夫五經羣史之書大
不過本天地設君臣明十倫五教之義陳政刑賞罰之柄述禮樂
制度之統究理亂興亡之由立邦之道盡於此矣非此典者謂之
無益世教則聖人不書學者不覽懼人冥煩而無所從也先師宣
尼祖述堯舜憲章文武七十子之徒常宣明大義三代之道百代
可師而諸子云云猥復制作由其門則其教已備反其道則其人
可誅而學者以多闕為廣見以異端為博聞是非紛然塞胸滿腹
鴻洞茫昧而無條貫或舉其中不知其本原其始不要其終高談
有餘待問則泥雖馳驅百家日誦萬字學彌廣而志彌惑聞愈多
而識愈疑此所以勤苦而難成殆非君子進德修業之意也今通
典之作昭昭乎其警覺羣迷歟以為君子致用在乎經邦經邦在
乎立事立事在乎師古師古在乎隨時必參今古之宜窮終始之
妙始可以度其終古可以行於今問而辨之端如貫珠舉而行之
審如中鵠夫然故施於文學可為通儒施於政事可建皇極故採

五經羣史上自黃帝至於我唐天寶之末每事以類相從舉其終
始歷代沿革廢置及當時羣生論議得失靡不條載附之於事如
人支脈散綴其體凡有八門勒成二百卷號曰通典非聖之書乖
聖人微旨不取焉惡煩雜也事非經世緯俗程制亦所不錄棄無
益也若使學者得而觀之不出戶知天下未從政達人情罕更事
知時變為功易而速為學精而要其道甚直而不徑其文甚詳而
不煩推而通放而準語備而理盡例明而事中舉而措之如指諸
掌不假從師聚學而區以別矣非聰明獨見之士孰能修之淮南
元戎之佐曰尚書主客郎京兆杜公卿雅有遠度志於興邦篤
於好古生而知之以大歷之始實纂斯典累紀而成杜公亦自為
序引各冠篇首或前史有關申高見發明以示勸誡用存景行近
代學士多有撰集其最著者御覽藝文玉燭之類網羅古今博則
博矣然率多文章之事記問之學至於刊列百度緝熙王猷至精
至粹其道不雜比於通典非其倫也嗚呼今之人賤近而遺遠昧

微而觀著得之者甚鮮知之者至稀可以歎息也翰與杜公數句
探討故頗詳旨趣而為之序

獨孤常州集序

李舟

傳曰物生而後有象象而後有滋滋而後有數數成而文見矣始
自天地終於草木不能無文也而況於人乎且夫日月星辰天之
文也邱陵川瀆地之文也羽毛彪炳鳥獸之文也華葉彩錯草木
之文也天無文四時不行矣地無文九州不別矣鳥獸草木之無
文則混然而無名而人不能用之矣人無文則禮無以辨其數樂
無以成其章有國者無以行其刑政立言者無以存其勸誡文之
時用大矣哉在人賢者得其大者禮樂刑政勸誡是也不肖者得
其細者或附會小說以立異端或雕斲成言以裨對句或志近物
而玩童心或順庸聲以諧俚耳其甚者則矯誣盛德汗巖風教為
蠱為蠹為妖為孽噫文之弊有至是者可無痛乎天后朝廣漢陳
子昂獨泝頽波以趣清源自茲作者稍稍而出先大夫嘗因講文

謂小子曰吾友蘭陵蕭茂挺趙郡李遐叔長樂賈幼幾洎所知河
南獨孤至之皆憲章六藝能探古人述作之旨賈為元宗巡蜀分
命之詔歷歷如西漢時文若使三賢繼司王言或載史筆則典謨
訓誥誓命之書可彷彿於將來矣嗚呼三公皆不處此地而運蹇
多故惟獨孤至常州刺史享年亦促豈天之未欲振斯文耶小子
所不能知也已矣常州諱及有遺文三百篇安定梁肅編為上下
帙分二十卷作為後序常州愛士而肅最為所重討論居多故其
為文之意肅能言之比葬博陵崔貽孫又為神道碑悉載行事而
痛其不登論道之位崔公剛而好直其詞不黨君子謂之知言昔
班孟堅美漢得人之盛曰文章則司馬遷相如又曰劉向王褒以
文章顯是則四君子者有漢之文雄歟然而遷無鄉曲之譽虧大
雅明哲保身之美相如薄於貞操有滌器受金之累向無威儀遺
文以繆而身幾不免褒多為歌頌當時議者以為淫靡不急其他
無聞焉大較詞人多陷輕躁否則悞狹迂僻於事放弛其能蹈履

中道可爲物主者寡矣孰與常州發論措詞皆王霸大略孝悌之
至達於神明善與人交久而敬之當官正色不畏強禦加之以仁
惠愛物吏民敬畏而文又如是乎其餘則二君旣言之矣今直錄
崔氏之作綴於篇末云爾

五經文字序例

張參

易繫辭曰上古結繩以理後代聖人易之以書契百官以理萬人
以察蓋取諸夬夬決也王庭孚號決之大者決以書契也逮周禮
保氏掌養國子以道教之六書謂象形指事會意諧聲轉注假借
六者造字之本也雖蟲篆變體古今異文離此六者則爲謬惑矣
王者制天下必使車同軌書同文故教人八歲入小學文有疑者
則必闕而求之春秋之末保氏教廢無所取正各遂其私故孔子
曰吾猶及史之闕文也今亡矣蓋夫子少時人猶有闕疑之間後
亡斯道歎其不知而作之也蕭何漢制亦有著法太史試學童諷
書九千字乃得爲吏以六體試之更人上書字或不正輒有舉劾

皆正史遺文可得焯知者也劉子政父子校中祕書自史籀以下
凡十家序爲小學次於六藝之末後漢許叔重收集籀篆古文諸
家之學就隸爲訓注謂之說文時蔡伯喈亦以滅學之後經義分
散儒者師門各滯所習傳記交亂訛僞相蒙乃請刊定五經備體
刻石立於太學之門外謂之石經學者得以取法焉遭離變難僅
有存者後有呂忱又集說文之所漏略著字林五篇以補之今制
國子監置書學博士立說文石經字林之學舉其文義歲登下之
亦古之小學也自頃考功禮部課試貢舉務於取人之急許以所
習爲通人苟趨便不求當否字失六書猶爲壹事五經本文蕩而
無守矣十年夏六月有司以職事之病上言其狀詔委國子儒官
勘校經本送尚書省參幸承詔旨得與二三儒者分經鉤考而共
決之互發字義更相難極又以前古字少後代稍益之故經典音
字多有假借謂若借后爲後辟爲避大爲陸氏釋文自南徂北徧
通眾家之學分析音訓特爲詳舉固當以此正之唯今文尙書改
就今字刪定月

令依其時進本與釋卒以所刊書于屋壁雖未如蔡學之精密石
文音訓頗有不同經之堅久慕古之士且知所歸然以經典之文六十餘萬既字帶
或體若鼎彝同物禮經相外為遠同姓春音非一讀若鄉原之鄉
材為哉兩音出於一學者傳授義有所存離之若有失合之則難
家而不決其當否並至當之餘但未發其傍而已猶慮歲月滋久官曹代易儻復蕪
汗失其本真乃命孝廉生顏傳經收集疑文互體受法師儒以為
定例凡一百六十部三千二百三十五字分為三卷說文體包古
今先得六書之要若古文作明篆文作闕古文作坐篆文作有不
備者求之字林若禮禮通遙之類說文其或古體難明眾情驚懼
者則以石經之餘比例為助若宜變為晉之類說文宜
代之石經湮沒所存者寡通以經典及釋文相承隸省引而伸之不
敢專也若舊變為壽樂變為栗之類石近代字樣多依四聲傳寫
之後偏傍漸失今則采說文字林諸部以類相從務於易了不必
舊次自非經典文義之所在雖切於時略不集錄以明為經不為

字也其字非常體偏有所合者詳其證據各以朱字記之俾夫觀
省無至多惑大歷十一年六月七日司業張參序

岑嘉州集序

杜確

自古文體變易多矣梁簡文帝及庾肩吾之屬始為輕浮綺靡之
詞名曰宮體自後沿襲務於妖豔謂之摘錦布繡焉其有敦尚風
格頗存規正者不復為當時所重諷諫比興由是廢缺物極則變
理之常也聖唐受命斬雕為樸開元之際王綱復舉淺薄之風茲
焉漸革其時作者凡十數輩頗能以雅參麗以古雜今彬彬然燦
燦然近建安之遺範矣南陽岑公聲稱老著公諱參代為本州冠
族曾太公文本大父長倩伯父義皆以學術德望官至台輔早歲
孤貧能自砥礪徧覽史籍尤工綴文屬辭尚清用意尚切其有所
得多入佳境迴拔孤秀出於常情每一篇絕筆則人人傳寫雖閭
里士庶戎夷蠻貊莫不諷誦吟習焉時議擬公於吳均何遜亦可
謂精當矣天寶三載進士高第解褐右內率府兵曹參軍轉右威

衛錄事參軍又遷大理評事兼監察御史充安西節度判官入爲右補闕頰上封章指述權佞改爲起居郎尋出虢州長史又改太子中允兼殿中侍御史充關西節度判官聖上潛龍藩邸總戎陝服參佐僚史皆一時之選由是委公以書奏之任入爲祠部考功二員外郎轉虞部庫部二正郎又出爲嘉州刺史副元帥相國杜公鴻漸表公職方郎中兼侍御史列於幕府無幾使罷寓居於蜀時西川節度因亂受職本非朝旨其部統之內文武衣冠附會阿諛以求自結皆曰中原多故劔外小康可以庇躬無假向闕公乃著招蜀客歸一篇申明逆順之理折挫邪佞之計有識者感歎奸謀者慚沮播德澤於梁益鳴皇風於邛犍旋軫有日犯軼俟時吉往凶歸嗚呼不祿歲月逾邁殆三十年嗣子佐公復纂前緒亦以文采登名翰場有公遺文貯之篋篋以確接通家餘烈忝同聲後輩受命編次因令繕錄區分類聚勒成八卷倘後之詞人有所觀覽亦由聆度樂者識清商之韻游名山者仰翠微之色足以瑩徹

心府發揮高致焉京兆杜確序

穆公集序

許孟容

班孟堅謂有漢文章與三代同風巨唐化成稽古斯文配炎靈之盛浸息淫靡歸於正聲由是業文之士蓄靈含粹光價時獨者往往間出吾友河南穆員字輿直麟蔚鳳采自天而授誦六經得其研深閱百代得其英華屬詞匠意必本於道夫龍圖龜書三統之有述皆文之蘊也自雅頌風騷而下則又粉澤而成黼藻雕鐫而爲形象比其音而曲度之緣其情而哀樂之悠遠易直昭明典則本情性而根教化者率漫羨魁壘繁音豔彩習怪誕而尙沈溺者也穆君泝其波流擇其宗師以爲文宣王經春秋序詩書繫易象猶日月不可及矣游夏荀孟李斯賈誼之徒是宜學者十駕百已鑽仰而憲章者也故其文融朗恢健沈深理辨墉闔四會精銳百練結而爲峻極散而爲游衍其工也異今而從古其旨也懲惡而從善跡夫孝於其上慈於其下擇中庸而後蹈推久要而後交則

向之詞藝由積哀痛耀發而為身瑞者也顏回黃憲仁而大促揚
雄司馬遷才而不試穆君年逾四十用止幕畫并四賢之德器而
祿壽似焉彼洪鑪埏埴真宰不直歟為天地無心芻狗萬化歟大
凡碑誌文冊銘贊記序六十五首共成十卷於先府君先夫人元
堂誌見自身刑家自家刑國父子子夫夫婦婦之道於祭顏太
師張相國文見君仁臣忠捍患成功感憤激烈死輕鴻毛之道向
使假其永齡登金馬石渠與獻納論思之臣發揮謨訓潤色王度
則聖朝文苑頌甘泉賦羽獵卿雲褒臯羣子之列加一士也斯楊
嗣仁所以賦已友之哀余所莫疑矣宋之問遺草編次授於伯兄
舊御史中丞今常州刺史善知音者唯子期乎發篋開卷如升元
圃將垂來代敢失其傳

兵部郎中楊君集序

權德輿

周家忠厚文章備乎二代先師有郁郁之歎故周任史克仍叔吉
甫之倫生焉漢氏剗煩苛宏利澤訓辭深厚議論宏大故賈誼揚

雄司馬遷相如之才出焉唐興幾二百歲紹聞周漢之逸軌以人
文華國猶雲漢之為章于上江漢之為紀于下九功成焉百度貞
焉王澤浹洽故斯文煥發秉筆之士皆欲泝末流而挹清源拔埃
盪而棲顛氣至若詞合雅言中倫疏通而不流博富而有節潔靜
夷易得其英華者其宏農楊君歟君諱疑字懋功孝弟純懿中和
特立早歲違難於江湖間與伯氏嗣仁叔氏恭履修天爵振儒行
東吳賢士大夫號為三楊易象之懿文孔門之言詩皆生知之舉
進士甲科賢公交辟典校祕書四遷至冠柱後惠文徵拜左史歷
司封員外左司郎中不附離權右陰為所中以其外相師律非君
莫可他日計事如京師復命于梁會其帥既沒軍司馬代之詔未
下兵火氣燄殺人以逞明神佑善獨脫死地中貴人持尺一詔書
徵還燕居四年不交人事磅礴三古推明六義措跡愈退而屬詞
愈精時恭履捐館一紀君與嗣仁倍手足之愛壬午歲嗣仁以中
執法廉湘中七郡風俗君起家為兵部郎中伯仲昌大輝華中外

方將乘迅颺摩赤霄極文采之用爲太平嘉瑞協書命於謨訓薦
聲詩於郊廟命屈其才末如之何君嘗以爲尙氣者或不能精密
言理者或不能彪炳鏤烝彝景鐘與緣情比興者或不能相爲用
仲宣體弱公幹未遒才難而力不足從古所病故懋功於六經百
氏之中如良金巧冶鍛鍊在手而又弛肩防矧約束恬然而據上
遊坦然而蹈中行其敘事推理況今據古多而不煩簡而不遺彌
綸條鬯無入而不自得所著文一百四十餘篇歌詩倍之皆天球
大圭奇采逸響不待數珎瓊珮玦之目然後知其妙噫自天寶已
還操文柄而爵位不稱者德輿先大夫之執曰趙郡李公遐叔河
南獨孤公至之狎主時盟爲詞林龜龍止於尙書郎二千石屬者
亡友安定梁肅寬中平夷朗暢傑邁間起博陵崔鵬元翰博厚周
密精醇不雜二君者雖嘗司密命裁贊書而終不越於諫曹計部
今懋功亦以中兵下大夫奄忽不淑豈造物者不與其全歟復舛
錯歟此吾徒故人所以索然出涕而有百身之痛也嗣仁類其文

爲二十篇緘詞甚哀猥見授簡以德輿早辱厚善忘其不能其代
德家法與踐履始中終之說嗣仁刻石紀墓旣詳言矣徒采其述
作大旨直書以綴于篇

魏國公貞元十道錄序

權德輿

序曰自夏書禹貢周官職方漢志地理厥後史臣繼有其書國家
將九夷不冒四海梯航聲朔過前古遠甚相國魏公明誠助化育
奧學窮古今百揆師長十年樞衡贊端拱無爲之風以育天下王
佐盛業論著形焉嘗以爲言區域者闕略未備或傳疑失實於是
獻海內華夷圖一軸古今郡國縣道四夷述四十卷盡瀛海之地
窮鞮譯之詞陳農不獲之書朱贛未條之俗貫穿切劘靡不詳究
開卷盡在披圖朗然又撮其要會切於今者爲貞元十道錄四卷
其首篇自貞觀初以天下諸州分隸十道隨山河江嶺控帶紆直
割裂經界而爲都會在景雲爲按察在開元爲採訪在天寶以州
爲郡在乾元復郡爲州六典地域之差次四方貢職之名物廢置

升降提封險易因時制度皆備於編而又考迹其疆理以正謬誤採獲其要害而陳開置至若護單于府並馬邑以北理榆林關外宜隸河東樂安自乾元後河流改故道宜隸河南合川七郡北與隴坻南與庸蜀回遠不相應宜於武都建都府以恢邊備大凡類是者十有二條制萬方之樞鍵出千古之耳目故今之言地理者稱魏公焉公之意豈徒洽聞廣記以學名家而已哉蓋體國遠馭不出戶而知天下親百姓撫四夷真宰相之事也凡今三十一節度十一觀察與防禦經略以守臣稱使府者共五十列於首篇之末其三篇則以十道為準縣距州州距兩都書其道里之數與其四鄙所抵其事覈其言詳閱覽默識精徵錯綜斯為至矣德輿忝掖垣之屬承公話言盱衡屈指珠貫冰釋辱命授簡書其大端輒罄斐然之辭豈揚不朽之業時貞元壬午歲夏四月謹序

唐故漳州刺史張君集序

權德輿

善乎揚子雲之言曰詩人之賦麗以則班固亦曰賦者古詩之流

也至若言天下之事業美盛德之形容皆源委於是而派流寢大然則體物導志其為文之本歟清河張登剛潔介特不趨和從俗循性屬詞發為英華秉直好靜居多隱約始以巾褐辟歷衛佐廷尉平監察御史罷去家居以薦延改河南士曹掾滿歲計相表為殿中侍御史董賦於江南無何授漳州刺史居七年坐公事受劾吏議侵誣胸臆約結感疾不起悲夫君以偉詞逸氣滯於奧潔之下又疾卑調細人白黑太明矯枉憤厲往往過正故其賦有云鵠必鬪而知斃龍就屠而不馴又云賤而榮兮跌而喪痛一世之紛綸皆所以感慨頓挫放言而兆憂賈禍恒必由之二十年間數免希遷志力相盪斯亦從古才士之所患也與夫脅肩令色坐取曠貴者豈同日哉所著詩賦之外書啟序述誌記銘誄合為一百二十篇相如之形似二班之情理公幹之卓犖經奇景陽之鏗鏘蔥蒨升堂睹奧我無媿焉自古富貴而名磨滅者何可勝紀如張君求居寄別懷人三賦與徵相一篇意所有激鏘然玉振子嘗吟咀

唐文粹補遺卷二十一
於層吻之間以為儻有繼梁昭明之為者斯不可遺也已曾不得
登金閨玉堂備言語侍從之列伏守海郡迫阨終身可勝歎耶君
之孤宣猷以予建中初同為丹陽公從事捧持遺文拜泣見託開
卷三復追懷舊故詠言擊節髣髴如聞列於左方傳諸好事云爾

唐文粹補遺卷第二十一

唐文粹補遺目錄卷第二十二

序二

上元和郡縣圖志序 李吉甫

監察御史儲公集序 顧況

劉商郎中集序 武元衡

董氏武陵集序 劉禹錫

卓異記序 李翱

樊南甲集序 李商隱

松陵集序 皮日休

添漁具詩序 前人

文藪序 前人

唐文粹補遺卷第二十二

上元和郡縣圖志序

吳江 郭麐 祥伯 纂
英山 金勇 仁甫 校

李吉甫

臣聞王者建州域物土疆觀次於星躔察法於地理考中國山河之象求二儀險阻之情天漢萌而兩界分南官正而五均敘自黃帝之方制萬國夏禹之分別九州辨方經野因人緯俗其揆一也及秦皇并六國則罷侯而置守漢武討百蠻則窮兵而黷武雖裂為郡縣者遠過於殷周而教令之所行威懷之所服亦不越於三代失天地作限之意非皇王尚德之仁誇志役心久而後悔由此觀之則聖人疆理之制固不在荒遠矣吾國家肇自貞觀至於開元兼夏商之職貢掩秦漢之文軌梯航累乎九譯旣置通乎萬里然後分疆以辨之置吏以康之任所有而差貢賦因所宜而制名物守其要害險其走集經理之道冠乎百王巍巍乎無得而稱矣

易曰天險不可升地險山川邱陵王公設險以守其國險之時用大矣哉然則聖人雖設險而未嘗恃險施於有備之內措於立德之中其用常存其機不顯弛張開闔因變制權所以財成二儀統理萬物故漢祖入關諸將爭走金帛之府惟蕭何收秦圖書高祖所以知山川阨塞戶口虛實厥後受命汜水定都洛陽留侯演委輅之謀田肯賀入關之策事關興替理切安危舉斯而言斷可識矣伏惟睿聖文武皇帝陛下握樞秉聖承祧立極祖堯舜之道憲文武之程皇王之遐蹤行之必至祖宗之耿光寢而復耀天寶之季王途暫艱由是墜綱解而不紐強侯傲而未肅逮至興運盡爲驅除故蜀有阻隘之夫吳有憑江之卒雖完保聚繕甲兵莫不手足裂而異處封疆一乎四海故鄜風偃朔塞砥平東西南北無思不服臣吉甫當元聖撫運之初從內庭視草之列尋備衰職久塵台階每自循省赧然收汗謨明弼諧誠淺智之不及簿書期會亦散才之不工久而伏思方得所效以爲成當今之務樹將來之

勢則莫若版圖地理之爲切也所以前上元和國計簿審戶口之豐耗續撰元和郡縣圖志辨州域之疆理時獲省閱或禱聰明豈欲希鄧侯之規模庶乎盡朱贛之條奏況古今言地理者凡數千家尙古遠者或搜古而畧今採謠俗者多傳疑而失實飾州邦而敘人物因邱墓而徵鬼神流於異端莫切根要至於邱壤山川攻守利害本於地理者皆畧而不書將何以佐明王捭天下之吭制羣生之命收地保勢勝之私示形束壤制之端此微臣之所以精研聖后之所宜周覽也謹上上和郡縣圖志起京兆府盡隴右道凡四十七鎮成四十卷每鎮皆圖在篇首冠於敘事之前并目錄兩卷總四十二卷臣學非博聞識愧經遠馳騫雖久漏畧猶名輕瀆宸嚴退增戰越謹上

監察御史儲公集序

顧況

聖人賢人皆鍾運而生述聖賢之意亦鍾運盛衰矣開元十四年嚴黃門知考功以魯國儲公進士高第與崔國輔員外綦毋潛著

唐文粹卷之二十一
作同時其明年擢第常建少府王龍標昌齡此數人皆當時之秀
而侍御聲價隱隱輔轡諸子其文篇賦論凡七十卷雖無雲雷之
會意氣相感而扶危拯病綽有賢達之風拔身虜庭竟陷危邦士
生不融可以言命然窺其鴻黃窈窕之學金石管磬之聲如登瑤
臺而進玉府靈扁邃宇景物寥映綠流翠草佳木好鳥不足稱珍
嗣息曰浴亦鳳毛駿骨恐墜先志泝洄千里泣拜告余曰我先人
與王右丞伯仲之歡也相國縉雲嘗以序冠編次會縉雲之謫亡
焉後輩據文之士風流不接故小子獲忝操簡伏恐魂遊無方嗟
責造次茫茫古道不見來者豈以龍戰害乎鹿鳴齊竽競吹燕石
爭寶嗚呼薄遊之士未躋一峯已伐其峻登闔風者乃知其迤邐
昏明掩豁將盡復通之者其若是乎

劉商郎中集序

武元衡

天運地轉剛柔生焉禮辨樂形文章出焉天之文莫麗乎日月地
之文莫秀乎山川聖人觀象立言用稽述作發乎性情形於咏歌

大則明天下政途彌綸王化小則舒一時幽憤刺見國風故子夏
云在心為志發言為詩聲成文謂之音也故可動天地感鬼神則
正始之道存焉有唐文士彭城劉公諱商字子夏眷予一先後之
輩睦於兩中外之親緣情所鍾愛亦加等顧惟遭幸秉國樞重燮
贊台衡之務統臨井絡之人其孤乃緘鐫遺文提捧萬里猥期序
引將佐詞林子感悼故知惻覽華藻珠玉綴錯清冷自飄皆素所
狎聞也泣然涕下不能自收矧公遐情浩然酷尚山水著文之外
妙極丹青好事君子或持冰素越淮湖求一松一石片雲孤鶴獲
者寶之雖楚璧南金不之過也晚歲擺落塵滓割棄親愛夢寐靈
仙之境逍遙元化之門又安知不攀附雲霓迹巖壑超然懸解
與漫汗游乎無閒邪著歌行等篇皆思入窅冥勢含飛動滋液瓊
瓌之朗潤澹發綺繡之濃華觸境成文隨文變象是謂折繁音於
孤韻貫清濟於洪流者也今所編錄凡二百七十七篇及早歲著
胡笳詞十八拍出入沙塞之勤崎嶇驚畏之患亦云至矣有若太

原王緒河東裴茂弟薦河南豆盧峯馮翊嚴紳弟綬及余伯
舅洎於子夏咸以儒業相資冠冑羣族雄詞麗句遍在人間子與
司空嚴公親結義深相與編葺恨不得繼采詩之末播於樂章且
傳諸名士庶幾不朽忝以宿姻舊好撫事追書故言之不讓也

董氏武陵集序

劉禹錫

片言可以明百意坐馳可以役萬景工於詩者能之風雅體變而
與同古今調殊而理冥達於詩者能之工生於才達生於明二者
還相為用而後詩道備矣余嘗執斯評為公是且衡而度之誠懸
乎心默揣羣才鈞銖尋尺隨限而盡如是所閱者百態一旦得董
生之詞杳如搏翠屏浮層瀾視聽所遇非風塵間物亦猶明金粹
羽得於遐裔雖欲勿寶可乎生名挺字庶中幼嗜屬詩晚而不衰
心源為鑪筆端為炭鍛鍊元本雕鑿羣形糾紛舛錯逐意奔走因
故沿濁協為新聲常所與游皆青雲之士聞名如盧杜高韻如包
李迭以章句揚於當時末路寡徒值余歡甚因相謂曰間者身以

廷尉屬為荊州從事移疾罷去幽卧於武陵迨今四年言未信於
世道不施於人寓其性懷播為吟咏時復發笥紛然盈前凡五十
篇因地為目吾子常號知我盍表而志之為生羽翼予不得讓而
著於篇因系之曰詩者其文章之蘊邪義得而言喪故微而難能
境生於象外故精而寡和千里之繆不容秋毫非有的然之姿可
使戶曉必俟知者然後鼓行於時自建安距永明已還詞人比肩
唱和相發有以朔風零雨高視天下蟬噪鳥鳴蔚在史策國朝因
之粲然復興由篇章以躋貴仕者相踵而起兵興已還右武尚功
公卿大夫以憂濟為任不暇器人於文什之間故其風寢息樂府
協律不能足新音以度曲夜諷之職寂寥無紀則董生之貧卧於
裔土也其不得於時者歟其不試故藝者歟

卓異記序

李翱

聖唐帝功瓌特奇偉前古無可比倫及臣下盛事超絕而殊常輝
昔而照今貽謀記敘家世徽範奉上虔密不自顯發人莫知之至

有誤為傳說者洎正人碩賢守道不撓立言行已真貫白日得以
愛慕遵楷其姦雄之跡覩而益明自勵廣記則隨所聞見雜載其
事不以次第然皆是警惕在心或可諷歎且神仙鬼怪未得諦言
非有所用俾好生不殺為仁之一途無害於教化故貽謀自廣不
俟繁書以見其意時開成五年七月在檀溪李翱撰

樊南甲集序

李商隱

樊南生十六能著才論聖論以古文出諸公間後聯為鄆相國華
太守所憐居門下時敕定奏記始通今體後又兩為祕省房中官
恣展古集往往嗚喙於任范徐庾之間有請作文或時得好對切
事聲勢物景哀上浮壯能感動人十年京師寒且餓人或目曰韓
文杜詩彭陽章檄樊南窮凍人或知之仲弟聖僕特善古文居會
昌中進士為第一二常表以今體規我而未為能休大中元年被
奏入嶺當表記所為亦多冬如南郡舟中忽復括其所藏火燹墨
汗半有墜落因削筆衡山洗硯湘江以類相等色得四百三十三

件作二十卷喚曰樊南四六四六之名六博格五四數六甲之取
也未足矜十月十二日夜月明序

松陵集序

皮日休

詩有六藝其一曰比比者定物之情狀也則必謂之才才之備者
於聖為六藝於賢為聲詩噫春秋之後頌聲亡寢降於漢氏詩道
存作然二雅之風委而不興矣在詩有三言四言五言六言七言
九言之作三言者曰振振鷺鷺于飛是也五言者曰誰謂雀無角
何以穿我屋是也六言者我姑酌彼金罍是也七言者交交黃鳥
止於桑是也九言者曰洞酌彼行潦挹彼注茲是也蓋古詩率以
四言為本而漢氏方以五言七言為之也其句亦出於周詩五言
者李陵曰攜手上河梁是也七言者漢武曰日月星辰和四時是
也爾後盛於建安以降江左君臣得其浮豔然詩之六藝微矣逮
及吾唐開元之世易其體為律焉始切於儷偶拘於聲勢詩云觀
閱既多受侮不少其對也工矣堯典曰聲依永律和聲其為律也

甚矣由漢及唐詩之道盡矣吾又不知干祀之後詩之道止於斯而已即後有變而作者不得以知之夫才之備者猶天地之氣乎氣者止乎一也分而為四時其為春則煦枯發枿如棄如獲百物融洽酣人肌骨其為夏則赫曦朝升天地如燾草焦木暍若燎毛髮其為秋則涼颼高督若露天骨景爽夕清神不蔽形其為冬則霜陣一淒萬物皆瘁雲沮日慘若憚天責夫如是豈拘於一哉亦變之而已人之有才者不變則已苟變之豈異於是乎故才之用也廣之為滄溟細之為溝竇高之為山嶽碎之為瓦礫美之為西子惡之為敦洽壯之為武賁弱之為處女大則八荒之外不可窮小則一毫之末不可見苟其才如是復能善用之則庖丁之牛扁之輪郢之斤不足謂神解也噫古之士窮達必形於歌詠苟欲見乎志非文不能宣也於是為其詞詞之作固不能獨善必須人以成之昔周公為詩以遺成王吉甫作誦以贈申伯詩之酬贈其來尚矣後每為詩必多關二為關一咸通七年今兵部令狐員外在

淮南今中書舍人關二公守毘陵日休皆以詞獲幸悉蒙以所製命之和各關二軸亦有名其守者十年大司諫清河公出牧於吳日休為郡從事居一月有進士陸龜蒙字魯望者以其業見造凡數篇其才之變真天地之氣也近代稱温飛卿李義山為之最俾生參之未知其孰為之後先也

添漁具詩序

皮日休

天隋子為漁具詩十五首以遺余凡有敵以來術之與器莫不盡於是也噫古之人或有溺於漁者行其術而不能言用其器而不能狀此與澤沮之敵者又何異哉如吟魯望之詩想其致則江風海雨械械生齒牙間真世外漁者之才也余昔之漁所在澗上則為庵以守之居峴下則占磯以待之江漢間時候率多雨唯以簞笠自庇每伺魚必多俯簞笠不能庇其上由是織篷以障之上抱而下仰字之曰背篷今觀魯望之十五篇未有是作因次而詠之用以補其遺者漁家生具獲足於吾屬之文也

文藪序

皮日休

咸通丙戌中日休射策不上第退歸州來別墅編次其文復將貢於有司登篋叢萃繁如藪澤因名其書曰文藪焉比見元次山納文編於有司侍郎楊公浚見文編歎曰上第污元子耳斯文也不敢希楊公之歎希當時作者一知耳賦者古詩之流也傷前王太僕作憂賦慮民道難濟作河橋賦念下情不達作霍山賦憫寒士道壅作桃花賦離騷者文之菁英者傷於宏奧今也不顯離騷作九諷文貴窮理貴原情作十原大樂既亡至音不嗣作補周禮九夏歌兩漢庸儒賤我左氏作春秋決疑其餘碑銘讚頌論議書序皆上剝遠非下補近失非空言也較其道可在古人之後矣古風詩編之文末俾視之粗俊於口也亦由食魚遇鯖持肉偶騃皮子世錄著之於後亦太史公自序之意也凡二百篇為十卷覽者無訕矣

唐文粹補遺卷第二十二

唐文粹補遺目錄卷第二十三

序三

北戶錄序 陸希聲

唐風集序 顧雲

周朴詩集序 林嵩

讒書重序 羅隱

陳先生集後序 前人

華嚴原人論後序 李純甫

自敘 劉子元

唐文粹補遺卷第二十三

吳江 郭麐 祥伯 纂
英山 金勇 仁甫 校

北戶錄序

陸希聲

詩人之作本於風俗大抵以物類比興達乎情性之源自非觀化
察時周知民俗之事博聞多見曲盡萬物之理者則安足以蘊為
六義之奧流為弦歌之美哉由是言之則古之學者固不厭博博
而且信君子難之東牟段君公路鄒平公之孫也自未能把筆愛
以指畫地如文字及六七歲受學果能強力不罷其學尤長仄僻
人所不能知者癖乎羣籍之中乞乞然有餘力間者以事南遊五
嶺間常采其民風土俗飲食衣製歌謠哀樂有異於中夏者錄而
志之至於草木果蔬昆蟲羽毛之類有瑰形詭狀者亦莫不畢載
非徒止於所聞見而已又能連類引證與奇書異說相參驗真所
謂博而且信者矣噫近日著小說者多矣大率皆鬼神變怪荒唐

誕妄之事不然則滑稽詼諧以為笑樂之資離此二者或強言故事則皆詆訾前賢使悠悠者以為口實此近世之通病也如君所言皆無有是其著於錄者悉可考驗此蓋博物之一助豈徒為譚端而已乎君以予往從事嶺南備覈其實請子序以為證予嘗觀圖於書府君狀貌一似鄒平公而又能以文學世其家於乎鄒平公為有後矣因為之序而不辭右拾遺內供奉陸希聲撰

唐風集序

顧雲

大順初皇帝命小宗伯河東裴公掌邦貢次二年遙者來隱者出異人俊士始大集都下於羣進士中得九華山杜荀鶴拔居上第諸生謝恩日列坐既定公揖生謂曰聖人嫌文教之未張思得如高宗朝拾遺陳公作詩出沒二雅馳驟建安削苦澀僻碎畧淫靡淺切破艷治之堅陣擒雕巧之酋帥皆摧摧折角崩潰解散掃蕩詞場廓清文祿然後有戴容州劉隨州王江甯率其徒揚鞭按轡相與呵樂來朝於正道矣以生詩有陳體可以潤國風廣王澤因

擢生以塞詔意生勉為中興詩宗生謝而退次年甯親江表以僕故山偕隱者出生平所著五七言三百篇見簡詠其雅麗清苦激越之句能使貪吏廉邪臣正父慈子孝兄良弟順人倫綱紀備矣其壯語大言則決起逸發可以左攬工部袂右拍翰林肩吞賈喻八九於胸中曾不帶芥或情發乎中則極思冥搜游泳希夷形兀枯木五聲勞於呼吸萬象悉於抉剔信詩家之雄傑者也美哉裴公之知人為不誣矣於戲旌別淑慝史臣之職也僕幸得為之敘錄視其人齒尚壯才力未盡謳吟之興方酣視其繼作得如周頌魯頌者廣之為唐風集老而益精留次序一作別為景福元年壬子夏述

周朴詩集序

林嵩

顏子聖聲與日月而不盡黔婁貧譽等江河而共存於戲先貧俱足亦顏黔之流而能於詩惜哉不雍容金馬門蹴踏宣尼戶乾符七年闔城殞賊悲夫先生名朴字見素生於釣臺而長於甌閩與

李建州頻方處士干爲詩友一篇一詠贈炙人口驚驚屈軼祥瑞
皇家迂僻而貧聾瞽不重高傲縱逸林觀宇宙視富貴如浮雲茂
珪璋如草芥惟山僧釣叟相與往還蓬門廬戶不庇風雨稔不杭
歉不變晏如也詩人張爲嘗貽先生詩曰到處只閉戶逢君便展
眉閩之廉問楊公發李公晦中朝重德羽翼詞人奇君之詩召而
不往或曰達寮憐才而子避之何也先生曰二公憐才吾固不往
苟或見之以吾之貧恐以攝假之牒見黜耳亦接輿於陵未能加
也松蟠鶴翅泥曳龜尾一邱一壑寬於天地先生爲詩思遲盈月
方得一聯一句得必驚人未暇全篇已布人口有僧樓浩高人也
與先生善摺拾先生遺文得詩一百首中和二年冬十月攜來訪
余且驚且喜余欲先生之文與方干齊集畢遂爲之序小子以詞
賦博挂投文非所業但直舉其美文觀作者

讒書重序

羅隱

隱次讒書之明年以所試不如人有司用公道落去其夏調膳於

江東不隨歲貢又一年朝廷以彭門就辟刀机猶溼詔吾輩不宜
求試然文章之興不爲舉場也明矣蓋君子有其位則執大柄以
定是非無其位則著私書而疏善惡斯所以警當世而誡將來也
自揚孟以下何嘗以名爲而又念文皇帝致理之初法制悠久必
不以蟣蝨癢痛遂偃斯文今年諫官有言果動天聽所以不廢讒
書也不亦宜乎

陳先生集後序

羅隱

穎川陳先生諱黯字希孺曩者與予聲跡相接於京師各獲譽於
進取咸通庚寅歲膠其道於蒲津秋試之場自後俱爲小宗伯所
困不一至甲申春告予以婚嫁之牽制東歸青門操執之後余亦
東遊逮大梁時故杭州盧員外溥在幕齋其文軸謂余曰陳君罷
而東豈其斯文之終窒乎子東及之爲我歸其文而激其來余至
維揚及歸其文遵其言相懽月而後別爲我謝范陽公龍門之役
不復顧矣由是音塵杜絕天復元年四門博士江夏君通家相好

於吳越面余論及場中曩之名士及希孺之表也余不覺愴然懷
舊明年黃君以其文章德業爲之序以寄俾予繫述遂得申斯言
嗚呼大唐設進士科三百年矣得之者或非常之人失之者或非
常之人若陳希孺之才美則非常之人失之者矣德行莫若敦於
親戚文章莫若大於流傳今已備於江夏之筆矣余不克再敘止
書交道於是噫

華嚴原人論後序

李純甫

草堂禪師佩曹溪心印註華嚴法界觀疏圓覺經又恐其理甚深
世俗未辨著原人論而學者猶苦其難入蓋唯心之旨非自悟者
不能信受也後三百歲白衣弟子李純甫又作睡語題其端云如
人初夢一刹那頃根身器界異類眾生一時頓現種種各別一念
力頓成就具足無量境界覺人呼覺始知夢中元無我人眾生壽
者諸相亦無地水火風等物畢竟虛空唯依第六意識以爲根本
然則覺人所見山河大地十二類生并自身相唯依第八業識其

理曉然無可疑焉有大覺者門說真空始故長夜宛如大夢等無
有異儒者道家夢中說夢未知是夢復有既知是夢戀著夢境不
知覺寤佛爲世人開說人天乘復有既知是夢厭惡夢境不知睡
眠佛爲是人開說聲聞緣覺二乘復有既知是夢故無戀著亦無
厭惡寤寐自如佛爲是人開說菩薩最上大乘於大乘中復有未
知夢由妄念而有境界佛爲是人說法相教復有未知本無妄念
夢境亦空佛爲是人說破相教復有未知夢中之人卽世覺者佛
爲是人說顯性教故知眾生本來成佛初發心時卽登正覺示起
於座便入涅槃原人一論卽覺者之一呼也釋其首尾大略如此
法同寢者應如是觀

自序

劉子元

予幼奉庭訓早遊文學年在紈綺便受古文尙書每苦其辭艱瑣
難爲諷讀雖屢逢捶撻而其業不成嘗聞家君爲諸兄講春秋左
氏傳每廢書而聽速講畢卽爲諸兄說之因竊歎曰若使書皆如

此吾不復忘矣先君奇其意於是始授以左氏期年而講誦都畢於時年甫十有二矣所講雖未能深解而大義略舉父兄欲令博觀義疏精此一經辭以獲麟已後未見其事乞且觀餘部以廣異聞次又讀史漢三國志既欲知古今沿革歷數相承於是觸類而觀不假師訓自漢中興以降迄乎皇家實錄年十有七而窺覽略周其所讀書多因假賃雖部帙殘缺篇第有遺至於敘事之紀綱立言之梗概亦粗知之矣但於時將求仕進兼習揣摩至於專心諸史我則未暇泊年登弱冠射策東朝於是思有餘閑獲遂本願旅遊京洛頗積歲年公私借書恣情披閱至如一代之史分爲數家其間雜記小書又競爲異說莫不鑽研穿鑿盡其利害加以自小觀書喜談名理其所悟者皆得諸衿腑非由染習故始在總角讀班謝兩漢便怪前書不應有古今人表後書宜爲更始立紀當時聞者共責以童子何知而敢輕議前哲於是赧然自失無辭以對其後見張衡范曄集果以二史爲非其有暗合於古人者蓋不

可勝紀始知流俗之士難與之言凡有異同蓄諸方寸及年已過立言悟日多常恨時無同好可與言者維東海徐堅晚與之遇相得甚歡雖古者伯牙之識鍾期管仲之知鮑叔不是過也復有永城朱敬則沛國劉允濟吳興薛謙光河南元行沖陳留吳兢壽春裴懷古亦以言議見許道術相知所有揚摧得盡懷抱每云德不孤必有鄰四海之內知我者不過數子而已矣昔仲尼以睿聖明哲天縱多能觀史籍之繁文懼覺之者不一刪詩爲三百篇約史記以修春秋讚易道以黜八索述職方以除九邱討論墳典斷自唐虞以迄於周其文不刊爲後王法自茲厥後史籍逾多苟非命世大才孰能刊正其失嗟予小子敢當此任其於史傳也嘗欲自班馬以降迄於姚李令狐顏孔諸書莫不因其舊義普加釐革但以無夫子之名而輒行夫子之事將恐致驚愚俗取咎時人徒有其勞而莫之見賞所以每握管歎息遲回者久之非欲之而不能實能之而不敢也既朝廷有知意者遂以載筆見推由是三爲史

臣再入東觀每惟皇家受命多歷年所史官所編粗為紀錄至於紀傳及志則皆未有其書長安中年會奉詔預修唐史及今上即位又勅撰則天大聖皇后實錄凡所著述常欲行其舊議而當時同作諸士及監修貴臣每與其鑿柄相違齟齬難入故其所載削皆與俗浮沈雖自謂依違苟從然猶大為史官所嫉嗟乎雖任當其職而吾道不行見用於時而美志不遂鬱快孤憤無以寄懷必寢而不言嘿而無述又恐沒世之後誰知予者故退而私撰史通以見其志昔漢世劉安著書號曰淮南子其書牢籠天地博及古今上自太公下至商鞅其錯綜經緯自謂兼於數家無遺力矣然自淮南以後作者無絕必商榷而言則其流又眾蓋仲尼既沒微言不行史公著書是非多謬由是百家諸子詭說異辭務為小辨破彼大道故揚雄法言生焉儒者之書博而寡要得其糟粕失其菁華而流俗鄙夫貴遠賤近傳茲抵牾自相欺惑故王充論衡生焉民者冥也冥然罔覺率彼愚蒙墻面而視或訛音鄙句莫究本

源或守株膠柱動多拘忌故應劭風俗通生焉五常異稟百行殊軌能有兼偏知有長短苟隨才而任使則片善不遺必求備而後用則舉世莫可故劉邵人物志生焉夫開國承家立身立事一文一武或出或處雖賢愚壤隔善惡區分苟時無品藻則理難銓綜故陸景典語生焉詞人屬文其體非一譬甘辛殊味丹素異彩後來祖述識昧圓通家有詆訶人相倚撫故劉勰文心生焉若史通之為書也蓋傷當時載筆之士其義不純思欲辨其指歸殫其體統夫其書雖以史為主而餘波所及上窮王道下挾人倫總括萬殊包吞千有自法言以降迄於文心而往固以納諸胸中曾不蒂芥者矣夫其為義也有與奪焉有褒貶焉有鑒誡焉有諷刺焉其為貫穿者深矣其為網羅者密矣其所商略者遠矣其所發明者多矣蓋談經者惡聞服杜之啻論史者憎言班馬之失而此書多譏往哲喜述前非獲罪於時固其宜矣猶冀知音君子時有觀焉尼父有云罪我者春秋知我者春秋抑斯之謂也昔梁徵士劉孝

標作敘傳其自比於馮敬通者有三而予輒不自揆亦竊比於揚
子雲者有四焉何者揚雄嘗好雕蟲小伎老而悔其少作予幼喜
詩賦而壯都不爲恥以文士得名期以述者自命其似一也揚雄
草元累年不就當時聞者莫不哂其徒勞余撰史通亦屢移寒暑
悠悠塵俗共以爲愚其似二也揚雄撰法言時人競尤其妄故作
解嘲以訓之余著史通見者亦互言其短故作釋蒙以拒之其似
三也揚雄少爲范曄劉歆所重及聞其撰太元經則嘲以恐蓋醬
甑然劉范之重雄者蓋貴其文彩若長楊羽獵之流耳如太元深
奧難以探蹟旣絕窺踰故加譏誚余初好文章頗獲譽於當時晚
談史傳遂減價於知己其似四也夫才唯下劣而跡類先賢是用
銘之於心持以自慰抑猶有遺恨懼不似揚雄者有一焉何者雄
之元經始成雖爲當時所賤而桓譚以爲數百年外其書必傳其
後張衡陸績果以爲絕倫參聖夫以史通方諸太元今之君山卽
徐朱等數君是也後來張陸則未之知耳嗟乎儻使平子不出公

紀不生將恐此書與糞土同捐烟燼俱滅後之識者無得而觀此
子所以撫卷漣洏淚盡而繼之以血也

唐文粹補遺目錄卷第二十四

序四

偶遇巴西姜主簿序 陳子昂

會諸友詩序 張說

鄴公園池餞韋侍郎神都留守序 前人

冬夜裴員外薛侍御置酒宴集序 李白

別前岐山令鄒君序 沈亞之

同德寺湊禪師院羣公會集序 穆員

在會稽與京邑游好詩序 顧雲

唐文粹補遺卷第二十四

吳江 郭麐 祥伯 纂
英山 金勇 仁甫 校

偶遇巴西姜主簿序

予疲薊永久未嘗解顏正欲登高山望遠壑揮斥幽疴以劇太清
姜主簿倏自縣中至於林下乃節琴酒之事雜文章之娛將蠲我
憂頽靡取樂夫浩浩之白不可獨也青春之詩又誰咎也逢太平
之化寄當年之歡同人在焉而我何歎南國橘柚陽月初榮北梁
山水良辰復別揮手何贈詩以永言云爾

會諸友詩序

張說

谷子者昔與說聯務蓬山出入三載事志相得情深友于尋屬吾
人秩遷迫吏畿劇愛而不見春也再華今說復謝書坊補他職窮
後之意不擇儒林喜且把袂舊筵解帶餘日卧玩文墨笑談平生
茲歡豈多後面方永沈沈春雨人亦淹留

鄴公園池餞韋侍郎神都留守序

張說

夫良才出乎休運大任歸乎令德四海既安乃注意於賢相兩都
分正實具瞻乎師尹鸞臺侍郎兼左庶子韋公國之楨幹人之表
儀矜嚴有叔子之容持重得楊公之望門通禁省當朝稱累代之
名管綜諸闈帖職盡一時之美頃以五星東聚八月西巡武王既
入於鎬京君陳當往於洛邑中且晷之盈縮均天宇之會同清廟
明堂政理之本也太倉武庫兵食之原也機務所總半天下之軍
國聽訟實繁連海隅之郡縣恩有密而處遠事有疎而授親腹心
遐寄惟賢是屬歲臨單闕月在長贏同蕭何之居守當陰識之留
鎮北闕拜辭西堂宴餞大君垂藻承月露之光榮元良賜服被星
海之耀潤執事以同列之好載壺酒而送行鄴公以彌甥之禮掃
郊園而留別此地有離洲別嶼竹館荷亭曲沼環合而連注叢山
相望而閒起幽隱長寂蕭條遠風通終南之雲氣下昆明之水鳥
爾其駐馬青林肆筵碧岸清管四發坐客增悲高臺一望遊人忘

返韋公方祗率嘉命保釐成周樹之風聲流我王澤然而臨觴不
樂首路遲遲瑣闈夕拜戀未央之宮闕錦服晝遊懷杜陵之桑梓
層城日下高蓋雲飛天子賦詩已載寵行之史羣公盛集須傳出
宿之文凡若干首合成一卷陸生何幸暫遊朝宰之班商也斐然
輕述國風之序云爾

冬夜裴員外薛侍御置酒宴集序

李白

二公以大司馬之命領浙河東西十有三州之政相與周爰咨度
平均邦賦者三月矣當割而遊刃無間臨機而舍拔則獲由是在
簿領之際無江海而閒冬十月辛未徵會於此堂宴朋友故舊也
賢豪畢會升降有序逢衣淺帶十有五人聲同故窮達不問意得
而鄙吝皆遺肴芳酒濃夜寂琴暢慷慨言志絡繹舉白盱衡抵掌
啞啞大笑三爵耳熱萬念如洗不復計名身之親疎憂患之去來
也況他累乎既醉余以箸擊唾壺扣商而歌其詞曰簿領日盈機
知君傲煩囂飲和自忘渴況以初筵招商而歌其詞曰簿領日盈機

何用結同心綠琴復長瓢日月若走馬炎涼催斗杓一年解頤笑
幾日如今宵奉君千金壽莫使歲寒凋是日禮成於易歡生於同
滯憤積慘彗掃湯沃方今溟海始波世屯未康二公克壯其猷以
立事爲己任行當自致青雲之上不復與適莽蒼者羣矣吾儕浮
沉其間與風水俱它日或潛泉或戾天一雖一合雲動雨散然後
知今日尊酒未易再得將子無金玉其音姑借賦以卒賦

別前岐山令鄒君序

沈亞之

昔者亞之西遊過岐山而令秩始謝余將就給食人曰故令雖貧
然能卑人厚禮何不往舍也時方暑旣見解帶坐令衣弊緇短衣
使兒孫姪捧案前賓食食已有客越而請曰聞令家無女使賤走
賓客食必夫人親治之誠厚士勤矣且賓之來者無賢不肖皆卽
混然齊飽是愚爲冒矣而賢者安所愧乎今願擇之而厚結如何
也令曰古者侯生亦有言人固未易知夫士以食而來我者留於
門無繫帶之間尙已爲久矣焉能待辨而後進乎亦甯有給之一

食而使其甚媿固如是雖賢愚何望哉客慙而退至今三年與令
遇未嘗再會食客今令窮來京師人無假氣而延於進者嗟乎會
子與令各有適故書前事以敘所憤云

同德寺湊禪師院羣公會集序

穆員

歲五日杜揚州出鎮東洛羣公禮賓用饒會於此堂以候於戲從
公率俗道機交態倦息得於此樂道得於此眾君子同之員亦同
之况乃竹深寒庭雪淨禪室境捐世染坐對天涯甘茗代醪清論
如藥蓋勞生之少息羣心之一勝會耳惜乎夕鳥集暝客散候人
至車馬行各從爾可復返吾患嚮來所聚倏爾成空索過風於前
林求往夢於旣寤不可及也尙書郎李君曰其可及者詩猶庶乎
詩之哉

在會稽與京邑游好詩序

顧雲

造化之功東南之勝獨會稽知名前代詞人才子謝公之倫多所
吟賞湖山清秀超絕上國羣峯接連萬水都會昇高而望盡目所

窮蒼然黯然兀然澹然先春煦然似畫似翠似水似冰似霜似鏡
削玉似劍者霞布似窈窕者霜清似英絕者如是者千狀萬態綿
亘數百里間則夫盤龍於泉巢鳳於山蘊玉於石藏珠於淵固必
有矣真駭目喪精之所也其土沃其人文雖逼閩蠻而不失禮節
雖枕江海而不甚瘴疫斯焉郡邑一何勝哉將天地之樂萃於此
耶至於物土所產風氣所被鳥獸草木之奇妖冶嬋娟之出前聖
靈蹤往哲盛事此傳詩所詳不假重言也斯但粗述其勝耳僕雖
乏才自侍從至此晨夕習業之外游覽所得吟咏烟月攄散情志
自足一時之興也亦足快哉然時或倚檻南臨回首西望相交朋
遠誰與同之每思往年於京洛間見時俗之士浮淺之流多誇邑
外人家有水木田園莊舍甚為奇勝可比江山嘗與俱往謂信然
今在此乃知前者之悠悠妄誇耳不足聽且夫方壺員嶠桃源洞
天自標真聖之居不與羣塵相接非但計幽隱已也至於人寰所
有游觀必當顯敞知名若會稽山水深不可測高不可及如是乃

能孕靈怪藏珍寶生雲霞而盡勝槩耳豈於十畝之地朝夕之間
鑿為汗池植為幽藪源流既邇根柢可知深不過藏青蛙密不過
棲烏鵲而能出奇為勝哉今之君子多尚奇好事貴達顯揚幽僻
仄陋則言之而實不足徵也不然則是人能與造物爭功矣今序
其事貽諸明好知之者幸棄彼冗瑣而同此游也為通理矣輒以
數篇鄙拙寄贈誠玷視聽貴盡其樂以資笑言

唐文粹補遺目錄卷第二十五

序五

送劼赴太學序 王勃

送裴五司法赴都序 宋之問

饒宋司馬序 張九齡

送遂州紀參軍序 孫逖

送薛九遠遊序 李華

送田八落第東歸序 陶翰

送李兵曹往江外序 賈至

送李審秀才歸湖南序 任華

送譚山人歸雲陽序 元結

別崔曼序 前人

送蕭穎士赴東府序 劉太真

送陳秀才序 于邵

送安南裴中丞序權德輿

送解序柳宗元

送蔡沼孝廉及弟後歸閩觀省序歐陽詹

送友人遊蜀序呂溫

送孫生序皇甫湜

送盧侍御史赴王令公幕序符載

送草書僧歸楚越司空圖

唐文粹補遺卷第二十五

吳江 郭慶 祥伯 纂
英山 金勇 仁甫 校

送劼赴太學序

今之游太學者多矣咸一切欲速百端進取故夫膚受末學者因利乘便經明行修者華存實爽至於振骨鯁之風標服賢聖之言懷遠大之舉蓋有之矣未之見也可以深慕哉且吾家以儒輔仁述作存者八代矣未有不久於其道而求苟出者也故能立經陳訓刪書定禮揚魁梧之風樹清白之業使吾徒子孫有所取也大雅不云無念爾祖易不云幹父之蠱書不云惟孝友于詩不云不如友生四者備矣加之執德宏信道篤心則口誦廢食忘寢渙然有所成望然有所伏然後可以託教義編人倫彰風聲議出處若意不感慨行不卓絕輕進苟動見利忘義雖上一階履半級何足恃哉終見棄於高人但自溺於下流矣吾被服家業霑濡庭訓切

砥礪磨戰兢惕厲者二十餘載矣幸以薄技獲蠲戎役嘗恥道未
成而受祿恨不得如古君子四十強而仕也而房族多孤飢粥不
繼逼父兄之命覩饑寒之切解巾捧檄扶老攜幼今既至於斯矣
不蠶而衣不耕而食吾何德以當哉至於竭小人之心中猶子之
道飲食衣服晨昏左右庶幾乎令汝無反顧憂也行矣自愛游必
有方離別咫尺未足耿耿嗟乎不有居者誰展色養之心不有行
者孰就揚名之業邊豆有踐菽水盡心盍各賦詩敘離道意云爾

送裴五司法赴都序

宋之問

夫有別必感今昔其之蓋理迫聚散事均窮達望秦是斷腸之所
況念故園懷洛多掩涕之人更分良友裴五官業傳河寶才誕岳
靈彩思有神鬚眉若畫一日不見鄙悵都生千里送歸風流忽遠
朝英出餞迴北走於郊隅野墅銷雲引南山於庭際客飲恨而歡
促席含情而景遲日喬樹之將華青門戀舊背芳萱之稍吐金谷
逢春舉杯伊何願君軫之少駐賦詩於是旌予志之所之敢謂座

賓盍宣離唱

饒宋司馬序

張九齡

宋司馬才通命塞雲翼泥蟠蔡邕朔方不廢琴書之業賈誼宣室
欲言鬼神之事既而出宿南浦與鴻雁而同歸追餞北梁對江山
而不樂是日渚雲欲霽林鳥將春惜時物之方華重情人之自遠
羣公有感中座無歡他日清風自當元度之夕茲辰零雨得無子
荆之詠遂相與援翰賦詩贈行

送遂州紀參軍序

孫逖

遂州參軍紀公吾友雲將之令弟也敏於行志於道克修人彝允
副兄勗噫周公之允紀爲其首天祚明德必將有後不然何棣華
之可久也選曹舉善羣吏須才九霄始構一命而偃穆卜吉日邁
征畏途緬躋岷峨遐涉褒漢宿息巖險凌臨湍悍仗信不慄載義
必亨方慕忠臣之志固無垂堂之責爾之寡兄克施有政是則是
效念茲在茲福利則覲心永隔遠嫌則荒言自絕固雖叩焚之產

巴蜀之饒不潤脂膏誰謗蕙苾懋厥丕德時維哲人羣公贈言要僕題序

送薛九遠遊序

李華

士之舒羽毛宣聲調不在高位在有道自王充元宴左思名盛當時價壓百代薛都卿以夷澹養素以文章導志自浙右游湖左一句一韻遍於衣冠江山爲之鮮潤烟景以之明滅其餘情性所得蓋古人之儔歟南陽有畧兼有道之高元晏之道論其措意則王充左思豈其遠乎惠然訪余告以行邁將棹溪吳越濡札江嶠東南勝事落爾胷中況爲諸侯上賓知大夫之官族古所貴勉之哉病叟李遐叔贈

送田八落第東歸序

陶翰

田子行於古而志於文雅多清調將有新律鋒鏑甚銳將來者其憚之勿以三年未鳴六翮小挫則遂有清谿白雲之意夫才也者命在其中矣屈也者伸在其中矣將子少安吾以是觀德灞亭柳

綠昆池草青於何送歸無易詠歌

送李兵曹往江外序

賈至

千里之馬維而不馭則意在空谷而遠思豐草累鷲之鸚鵡而不搏則心在窮微而愈懷雲霄是以濟時命代之才或湮淪未遇之士眇然在滄海之上扁舟之中矣李侯吾之鮑子也我知其爲人立身清而廉從政敏而達內以孝悌著外以信義稱嘉辰良宵疊疊清話又足見林宗高識叔度洪量一命佐邑非以政學也再命環衛之曹非爲官擇也徒棲遲下位祿未代耕是以去游鏡亭探禹穴水宿雲卧彌年始還今又匹馬出關艤舟洛下念安石東山之賞懷子猷剡溪之興何雲思浩蕩而野情寥廓哉子困於徒勞累及五斗昇沈風波之裏踟躕長吏之前豈滄洲遠蹈之情南陽躬耕之意臨岐對酒有愧長劍想子行邁路經夷門見潁川陳兼河南子頤爲問道心無恙星鬢如何宿昔屢空復爲安邑也子近得陰君祕訣之北方河車郊原近山金鼎夕燎秋來氣冷爐火適

宜刀圭一開與子攜手

送李審秀才歸湖南序

任華

平西原之歲隴西李審自湘東來才甚清氣甚和節甚奇心甚高
僕是以恨相知晚也秋九月又言歸於湘東眾君子出餞於北郭
碧峰巉巖出於柏梢有如虎牙夾天而立加以白日欲落挂在巖
半橫照灘水月帶微明操袂於茲揮袂於茲恨無崑山片玉以相
贈贈君桂林之一枝審再拜曰幸甚

送譚山人歸雲陽序

元結

吾於九疑之下賞愛泉石今幾年能扁舟數千里來遊者獨雲
陽譚子譚子文學隱名山野隱身雲陽之阿世如君何牧犢愛雲
陽之宰峻公不出南岳三十年今得雲陽一峯譚子又在焉彼眞
可家之者邪子去爲吾謀於牧犢近峻公有泉石老樹壽藤縈垂
水可灌田一區火可燒種菽粟近泉可爲十數間茅舍所謂纒通
小船吾則往而家矣此邦舜祠之奇怪陽華之殊異瀘泉之勝絕

見峻公與牧犢當一一說之松竹滿庭水石滿堂石魚負樽鳧船
運觴醉送譚子歸於雲陽漫叟元次山序

別崔曼序

元結

漫叟年將五十與時不合垂三十年愛惡之聲紛紛人間博陵崔
曼惑叟所爲遊而辨之數月未去會潭州都督張正言薦曼爲蜀
邑長將行叟謂曰叟異時乃山林一病民耳宜不相罔行矣勿惑
吾子有才業且明辨又方年少必能樹勳庸垂名聲若求先達賢
異能相拔拭正在張公張公往年在西域主人能用其一言遂開
境千里威振絕域寵榮當世公往在淮南逡巡指麾萬夫風從遭
逢猜疑弛而不爲今海內兵革未息張公必爲時用吾子勉之所
相規者宜緩步富貴從容謀畫少節酒平氣槩耳

送蕭穎士赴東府序

劉太真

先師微言既絕者千有餘載至夫子而後洵美無度得夫天和頃
東倭之人踰海來賓舉其國俗願師於夫子非敢私請表聞於天

子夫子辭以疾而不之從也退然貧居迹作萬卷去其浮辭存乎
正言昔左氏失於煩穀梁失於短公羊失於俗而夫子爲其折衷
王公交辟拒而不應從官三年始參謀於洛京家兄與先鳴者六
七人奉壺開筵執弟子之禮於路左太真以文求進以無聞見舉
而不恡爲夫子羞春雲輕陰草色新碧皎皎匹馬出於青門吾徒
喟然瞻望不及賦詩仰餞者自相里造賈邕以下凡十二人皆及
門之選也

送陳秀才序

于邵

秀才以我府公有元昆同官之舊邂逅不見於今三年故不遠數
千里泝瀟湘踰零桂而循來上謁府公府公嘉是來也館有加籩
之餼讌有承筐之禮上下交好州人悅之旣而盈卷新文惠予佳
句艤舟將往咨我緒言夫閉門循來者遷客之心也窮巷迂轍者
達士之情也以達士之情眷索遷客不腆之作雖處憂危得無承
乎多謝之仁行矣自愛

送安南裴中丞序

權德輿

士君子循道致用感恩宣力則萬里如咫尺步溟波猶康莊况金印
照路熊車伏軾提封甚闊命賜甚厚此裴侯所以抃笑就道視交
州如衡輓之前則天時之瘴熱地里之迥遠皆細故也初裴侯夷
退燕息未嘗角逐於有司且曰不試則已豈能自售其後累以惠
文法冠爲戎輅上介甫登中臺旋鎮南服益純鈞百汰不得自閉
於匣中明矣今天子惠茲元元邁唐虞之風鄙夫司言九年玷辱
清近顧不得裁成蕃訓著一代典法耗竭蚩鄙爲明時羞思得上
分憂歎下布條職使四封之內列郡和洽斯亦大丈夫之事也因
君是行聊復起予追思往歲攜手相樂與蘭陵蕭元植范陽盧載
初宦遊出處多在江介索然物故何可勝言又想夫楊柳古灣秣
陵仁祠寒夜促膝歡言舉酒晦明颺馳忽二十年各乘風波時一
會合今日出祖話別在加餐自愛而已至若馬文泉之功畧士威
彥之教化憬俗裔人納諸掌握明珠文犀視同涕唾皆裴侯轂中

所畜也不復煩言

送澥序

柳宗元

人咸言吾宗宜碩大有積德焉在高宗時並居尚書省二十二
人遭諸武以故衰耗武氏敗猶不能興爲尚書吏者間十數歲乃一
人承貞年吾與族兄登並爲禮部屬吾黜而季父公綽更爲刑部
郎則加稠焉又觀宗中爲文雅者炳炳然以十數仁義固其素也
意者其復興乎自吾爲樛人居南鄉後之穎然出者吾不見之也
其在道路幸而過予者獨得澥質厚不諂敦朴有裕若器焉必
隆然大而後可以有受擇所以入之者而已矣其文蓄積甚富好
慕甚正若牆焉必基之廣而後可以有蔽擇其所以出之者而已
矣勤聖人之道輔以孝悌復嚮時之美吾於澥焉是望汝往哉見
諸宗人爲我謝而勉焉無若太山之麓止而不得升也其唯川之
不已乎吾去子終老於夷矣

送蔡沼孝廉及第後歸閩覲省序

歐陽詹

昔人論別有賦論恨有賦狀此離陳感憤其未見予於蔡侯是日
之情益古人之遺情也人之慚莫先乎同有求而一不得人之慕
莫甚乎偕遠遊而一先歸蔡侯沼字虛中予之邑人又懿親也虛
中以學予謬以文其受遣乎長吏皆求試於宗伯虛中登太常第
歸甯故園子有暴腮之困猶留京師同求在予則不得偕遊虛中
則先歸堂俱有親身亦祈達自負違顏落羽之恥對人飛鳴就養
之慶懷方寸爲丈夫稟太和曰人子不包羞不痛心行道之人也
虛中胷中有心者以予此辰之意如何哉悵悵淒淒渾渾迷迷飲
甘觴以若茶視春光其如秋周秦九軌之道吳楚千里之水聘逸
騎揚輕舟激爾清風歡拜非遠脫則姻昵家惟里閭到日榮賀盡
室當在念沽名之不異想出門之是同父也母也兄也弟也雖喜
人之善則有而傷子之不肖豈無重增子鬱結之端矣明鏡前平
衡下姿媚無取銖兩不登才歟命歟不自知也烹乳爲醢酬鍛金
爲干將子期烹鍛以變化虛中其行乎勿謂業就不增修勿謂名

成有所忽及此方遠大虛中志之

送友人遊蜀序

呂溫

始吾挹至源之貌若隴底積雪聳寒木於雲谿次吾覽至源之文
苦驪龍相追弄明月於泉窟末吾聽至源之論若泰山欲雨倒雲
氣於滄溟如其貌可以振肅周行如其文可以光潤石渠如其論
可以感動宣室而淪蕩江海垂二十年則不知天所以生之意
貞元甲乙歲以親故勸勉來遊京師時然後言無辯以動眾樂然
後笑無歡以接物義然後取無食以甯居慨然悔之決策長往因
登紫閣峯而指曰西南青冥色連岷峨吾行何歸山盡則住翌日
告別於友人太原王元運顧謂余曰高雲出岫無時雨之會與風
悠揚轉遠而散若至源者其猶雲耶蓋亦贈之序子和汝

送孫生序

皇甫湜

浮屠之法入中國六百年天下胥而化其所崇奉乃公卿大夫野
益荒人益饑教益頽天下將蕪而始渾然自上下安之若性命固

然也孫生天與之學獨曉然於厚夜聰然於大醉發憤著書攻而
指斥之其詞骯髒痛入肝血乃忘力之不足以死為斷庶幾萬一
悟主救人者嗚呼不得古人而與之必也生平遂除肉刑一女盲
也能移高山一翁願也彼髮褐雖翳地其無足憂乎西江之涯值
生盡出其說以為贊而見余余既悲而異之乃約其言

送盧侍御史赴王令公幕序

符載

持俯仰全檢劑從容溫謹之地齷齪之士也跨時俗尚奇偉抗志
風雲之表從橫之才也監察御史范陽盧公神宇聳峙襟靈爽拔
腕苛細於塵垢得豪雋於意氣義分形於造次才畫充於懷抱邁
迹遐逸與人無倫年未弱冠為鄱陽尉目事必割間無留刃勢掩
曹輩快聲馳江西伯常侍鮑公祭酒李公寵以賓介之日授以
叢劇之務政或闕漏我能補焉無幾何馳車遠遊北至恒冀聞以
利計於司徒王公司徒器之開深沈之懷垂沛然之愛歡則膠固
義存諷諭故能不四五年始自黃綬歷廷評司直冠惠文冠御史

雖取恩知已實自躡青雲之梯也况年纔黑髮采色照地奮於名
跡其心嶷嶷則氣高五白之博室有千金之數直大夫豪達之事
豈足累隘目之視耶昨扁舟南行次廬陵郡下適值侍御將歸華
幕幸接便道爲共濟之遊話酣意密備取賢主君之盛業歡喜失
次若無所從因輒以狂瞽私自忖度以爲人生於世其公者樹勳
烈銘鼎彝休聲巍巍垂之無窮其私者富貴壽考而已矣今令公
功德格皇天忠義貫古人地方數千里甲兵十餘萬身爲上公壽
方無疆英英三子殷如川瀆尚書以寬厚保師旅大夫以沈毅威
暴亂都尉以才智承恩澤一門英雄洪業所鍾生人之美盡於斯
矣成天下之務者時也射萬世之利者勢也若當此時抗雙旌驅
四牡星馳丹陛對敷休命彼燕趙東平之諸侯恥不若也皆執玉
帛爭修覲禮使純誠動鬼神之感光耀增日月之輝君臣之道穆
穆皇皇則史冊之美又盡於此矣夫何犬戎之瑣細而敢爲大國
之患難紆令公之思慮哉侍御犀額燕頤骨狀甚貴懸知是行也

必能露丹懇聘飛辨大陳明義以酬國恩山中異日偶承來問聞
侍御衰衣結綬從公於北闕之下明天子以卿大夫印綬加之不
可得而讓也窮秋葉脫雁號霜勁矣行道開襟下帆鐘陵眾君子
珪璋偉士英英照爛美侍御之所從也樂請抒詩什以貺之載懦
夫也醑觴疑所謂以附於敘末

送草書僧歸楚越

司空圖

儉荒之俗尤惡技於文墨者華氏流寓而至則遽發其橐焚棄札
牘之累以快既自容矣又仇沮繼至者若不勝其怨噫是華舌夷
心而又甚之者矣泊天下將亂則雖吾里其風亦變果儉荒之流
民亦多矣倘或未化亦其益孤不能自振苟聞志於吾技則必躍
而游之矧踵門而勤請者耶譬光僧生於東越雖幼落於佛而學
無不至故逸跡遒勁之外亦恣爲詩詩以導江湖沈鬱之氣是佛
首而儒其業者也雖孟荀復生豈拒之哉今繫名內殿且爲歸榮
足以光於遠矣永嘉西岑康樂勝遊之最是行也爲我論詩一

篇題於絕壁

唐文粹補遺卷第二十五

唐文粹補遺卷第二十五

唐文粹補遺卷目錄第二十六
傳

陳子昂別傳 盧藏用

大學生何蕃傳 韓愈

童區寄傳 柳宗元

馮燕傳 沈亞之

張保泉鄭年傳 杜牧

竇烈女傳 前人

趙女傳 皮日休

書李賀小傳後 陸龜蒙

唐文粹補遺卷第二十六

吳江 郭麐 祥伯 纂
英山 金勇 仁甫 校

陳子昂別傳

盧藏用

陳子昂字伯玉梓州射洪縣人也本居潁川四世祖方慶得墨翟
祕書隱於武東山子孫因家焉世為豪族父元敬瑰偉倜儻年二
十以豪俠聞屬鄉人阻饑一朝散萬鍾之粟而不求報於是遠近
歸之若龜魚之赴淵也以明經擢第授文林郎因究覽墳籍居家
園以求其志餌地骨鍊雲膏四十餘年嗣子子昂奇傑過人資狀
嶽立始以豪家子馳俠使氣至年十七八未知書嘗從博徒入鄉
學慨然立志因謝絕門客專精墳典數年之間經史百家罔不該
覽尤善屬文雅有相如子雲之風骨初為詩幽人王適見而驚曰
此子必為文宗矣年二十一始東入咸京遊大學歷抵羣公都邑
靡然屬目矣由是為遠近所籍甚以進士對策高第屬唐高宗大

帝崩於洛陽宮靈駕將西歸子昂乃獻書闕下時皇上以太后居
攝覽其書而壯之召見問狀子昂貌寢寡援然言王霸大略君臣
之際甚慷慨焉上壯其言而未深知也乃敕曰梓州人陳子昂地
藉英靈文稱偉曜拜麟臺正字時洛中傳寫其書市肆閭巷吟諷
相屬乃至轉相貨鬻飛馳遠邇秩滿隨常牒補右衛胄曹上數召
見問政事言多切直書奏輒罷之以繼母憂解官服闋拜右拾遺
子昂晚愛黃老之言尤耽味易象往往精詣在職默然不樂私有
掛冠之意屬契丹以營州叛建安郡王攸宜親總戎律臺閣英妙
皆署在軍麾特敕子昂參謀帷幕軍次漁陽前軍王孝傑等相次
陷沒三軍震懼子昂進諫曰主上應天順人百蠻向化契丹小醜
敢謀亂常天意將空東北之隅以資中國也大王以元老懿親威
略邁世受律廟堂弔人問罪具精甲百萬以臨薊門運海陵之倉
馳隴山之馬積南方之甲發西山之雄傾天下以事一隅此猶舉
太山而壓卵建瓴破竹之勢也然而張元遇王孝傑等不謹師律

授首虜庭由此長寇威而殆戰士夫寇威長則難以爭鋒戰士殆
則無以制變今敗軍之後天下側耳草野傾聽國政今大王冲謙
退讓法度不申每事同前何以統眾前如兒戲後如兒戲豈徒為
賊所輕亦生天下姦雄之心聖人威制六合故用聲爾非能家至
戶到然後可服況兵貴先聲今發半天下之兵以屬王安危成敗
在百日之內何可輕以為尋常大王若聽愚計即可行若不聽必
無功矣須期成功報國可欲送身誤國耶伏乞審聽請盡至忠之
言凡軍須先比量智愚眾寡勇怯強弱部校將帥士卒之勢然後
可合戰求利以長攻短今皆同前不量力又不簡練暗驅烏合敗
後怯兵欲討賊何由取勝僕一愚夫猶言不可況姦賊勝氣十倍
未可當也且統眾禦姦須有法制親信若單獨一身則朱亥金錐
有竊發之勢不可不畏人有負琬玉之寶行於途必被劫賊何者
為寶重人愛之今大王位重又總半天下兵豈直琬玉而已天下
利器不可一失一失即後有聖智之力難為功也故願大王於此

唐文粹卷三十一
一
決策非小讓兒戲可了若此不用忠言則至時機已失機與時一
失不可再得願大王熟察大王誠能聽愚計乞分麾下萬人以爲
前驅則王之功可立也建安方求鬪士以子昂素是書生謝而不
納子昂體弱多疾感激忠義嘗欲奮身以答國士自以官在近侍
又參預軍謀不可見危而惜身苟容他日又進諫言甚切至建安
謝絕之乃署以軍曹子昂知不合因籍默下列但兼掌書記而已
因登薊北樓感昔樂生燕昭之事賦詩數首乃泣然流涕而歌曰
前不見古人後不見來者念天地之悠悠獨愴然而涕下時人莫
之知也及軍罷以父老表乞罷職歸侍天子優之聽帶官取急而
歸遂於射洪西山構茅宇數十間種樹採藥以爲養嘗恨國史無
雜乃自漢孝武之後以迄於唐爲後史記綱紀麤立筆削未終鍾
文林府君憂其書中廢子昂性至孝哀號柴毀氣息不逮屬本縣
令段簡貪暴殘忍聞其家有財乃附會文法將欲害之子昂荒懼
使家人納錢二十萬而簡意未塞數與曳就吏子昂素羸疾又哀

毀杖不能起外迫苛政自度氣力恐不能全因命著自筮卦成仰
而號曰天命不佑吾其死矣於是遂絕年四十二子昂有天下大
名而不以矜人剛斷強毅而未嘗忤物好施輕財而不求報性不
飲酒至於契情會理兀然而醉工爲文而不好作其立言措意在
王霸大略而已時人不之知也尤重交友之分意氣一合雖白刃
不可奪也友人趙貞固鳳閣舍人陸餘慶殿中侍御史畢構監察
御史王無競亳州長史房融右史崔泰之處士太原郭襲徵道人
史懷一皆篤歲寒之交與藏用遊最久飽於其論故其事可得而
述也其文章散落多得之於人口今所存者十卷嘗著江上丈人
論將磅礴機化而與造物者遊遭家難亡之荆州倉曹槐里馬擇
曰擇昔從父友王適獲陳君欣然忘我幼齡矣榆關之役君籌其
謀戎安累年不接晤語聖歷初君歸甯舊山有挂冠之志子懷役
南遊遺茲歡甚幽林清泉醉歌茲詠周覽所記倏徧岷峨子旋未
幾陳君將化悲夫言絕道冥杳然若喪之幾延陵心許而彼已亡

天喪斯文我恨何及君故人范陽盧藏用集其遺文爲序傳識者稱其實錄嗚呼陳君爲不亡矣遂爲贊曰
岷山導江回薄萬里浩瀚鴻溶東注滄海靈光氤氳上薄紫雲其瑰寶所育則生異人於戲才可兼濟屈而不伸行通神明困於庸豎子曰道之將喪也命矣夫

太學生何蕃傳

韓愈

太學生何蕃入太學者廿餘年矣歲舉進士學成行尊自太學諸生推頌不敢與蕃齒相與言於助教博士助教博士以狀申於司業祭酒司業祭酒撰次蕃之羣行焯焯者數十餘事以之升於禮部而以聞於天子京師諸生以薦蕃名文說者不可選紀公卿大夫知蕃者比肩立莫爲禮部爲禮部者率蕃所不合者以是無成功蕃淮南人父母俱全初入太學歲率一歸父母止之其後開一二歲乃一歸又止之不歸者五歲矣蕃純孝人也閔親之老不自克一日揖諸生歸養於和州諸生不能止乃閉蕃空舍中於是太

學六館之士百餘人又以蕃之義行言於司業陽先生城請諭留蕃於是太學缺祭酒會陽先生出道州不果留歐陽詹生言曰蕃仁勇人也或者曰蕃居太學諸生不爲非義葬死者之無歸哀其孤而字焉惠之大小必以力復斯其所謂仁歟蕃之力不任其體其貌不任其心吾不知其勇也歐陽詹生曰朱泚之亂太學諸生舉將從之來請起蕃蕃正色叱之六館之士不從亂茲非其勇歟惜乎蕃之居下其可以施於人者不流也譬之水其爲澤不爲川乎川者高澤者卑高者流卑者止是故蕃之仁義充諸心行諸太學積者多施者不遐也天將雨水氣上無擇於川澤澗溪之高下然則澤之道其亦有施乎抑有待於彼者歟故凡貧賤之士必有待然後能有所立獨何蕃歟吾是以言之無亦使其無傳焉

童區寄傳

柳宗元

柳先生曰越人少恩生男女以貨視之自毀齒以上父兄鬻賣以覩其利不足則盜取他室束縛鉗梏之至有鬚鬢者力不勝皆屈

唐文粹卷之二十六
為僮當道相賊殺以為俗幸得壯大則縛取么弱者漢官因以為
己利苟得僮恣所為不問以是越中戶口滋耗少得自脫惟童區
寄以十一歲勝斯亦奇矣桂部從事杜周士為余言之童區寄者
柳州蕘牧兒也行牧且蕘二豪賊劫持反接布囊其口去逾四十
里之虛所賣之寄偽兒啼恐慄為兒恒狀賊易之對飲酒醉一人
去為市一人臥植又道上童微伺其睡以縛背及力下上得絕因
取及殺之逃未及遠市者還得童大駭將殺之童遽曰為兩郎僮
孰若為一郎僮耶彼不我恩也郎誠見完與恩無所不可市者長
入計曰與其殺是童孰若賣之與其賣而分孰若吾得專也幸而
殺彼甚善即藏其尸持童抵主人所愈束縛牢甚夜半童自轉以
縛即爐火燒絕之雖瘡手勿懼復取及殺市者因大號一虛皆驚
童曰我區氏兒也不當為僮賊二人得我我幸皆殺之矣願以聞
於官虛吏白州州白大府大府召視兒幼愿耳刺史顏証奇之留
為小吏不肯與衣裳吏護還之鄉鄉之行劫縛者側目莫敢過其

門皆曰是兒少秦武陽二歲而討殺二豪豈可近耶

馮燕傳

沈亞之

馮燕者魏豪人祖父無聞名燕少以意氣任專為擊毬鬪雞戲魏
市有爭財鬪者燕聞之往搏殺不平遂沈匿田間官捕急遂亡滑
益與滑軍中少年雞毬相得時相國賈公耽在滑能燕才留屬中
軍他日出行里中見戶傍婦人翳袖而望者色甚冶使人熟其意
遂室之其夫滑將張嬰者也嬰聞其故果歐妻妻黨皆怨望嬰會
嬰從其類飲燕伺得間復偃寢中拒寢戶嬰還妻開戶納嬰以裾
蔽燕燕卑脊步就蔽轉匿戶扇後而巾墮枕下與佩刀近嬰醉且
瞑燕指巾令其妻取妻取刀授燕燕熟視斷其妻頸遂持巾去明
旦嬰起見妻殺死愕然欲出自白嬰鄰以為真嬰殺留縛之趣告
妻黨皆來曰常嫉歐吾女乃誣以過失今復賊殺之矣安得他殺
事即其他殺而安得獨存耶其持嬰且百餘答遂不能言官家收
繫殺人罪莫有辨者強伏其辜司法官小吏持朴者數十人將嬰

就市看者圍面千餘人有一人排看者來呼曰且無令不辜者死
吾竊其妻而又殺之當繫我吏執自言人乃燕也司法官與俱見
賈公盡以狀對賈公以狀聞請歸其印以贖燕死上誼之下詔凡
滑城死罪皆免亞之曰予尚太史言而又好敘誼事其寶黨耳目
之所聞見而爲予道元和中外郎劉元鼎語予貞元中有馮燕事
得傳焉嗚呼淫惑之心有甚水火可不畏哉然而燕殺不誼白不
辜真古豪矣

張保皋鄭年傳

杜牧

新羅人張保皋鄭年者自其國來徐州爲軍中小將保皋年三十
鄭年少十歲兄呼保皋俱善鬪戰騎而揮槍其本國與徐州無有
能敵者年復能沒海履其地五十里不噎角其勇健保皋差不及
年保皋以齒年以藝常齟齬不相下後保皋歸新羅謁其王曰遍
中國以新羅人爲奴婢願得鎮清海使賊不得掠人西去其王與
萬人如其請自大和後海上無鬻新羅人者保皋既貴於其國年

錯莫去職饑寒在泗之漣水縣一日言於漣水戍將馮元規曰年
欲東歸乞食於張保皋元規曰爾與保皋所挾何如奈何去取死
其手年曰饑寒死不如兵死快況死故鄉耶年遂去至謁保皋飲
之極歡飲未卒其國使至大臣殺其王國亂無主保皋遂分兵五
千人與年持年泣曰非子不能平禍難年至其國誅反者立王以
報王遂徵保皋爲相以年代保皋天寶末安祿山亂朔方節度使
安思順以祿山從弟賜死詔郭汾陽代之後旬日復詔李臨淮持
節分朔方半兵東出趙魏當思順時汾陽臨淮俱爲牙門都將將
萬人不相能雖同盤飲食常睇相視不交一言及汾陽代思順臨
淮欲亡去計未決詔至分汾陽兵東討臨淮入請曰一死固甘乞
免妻子汾陽趨下持手上堂偶坐曰今國亂主遷非公不能東伐
豈懷私忿時耶悉召軍吏出詔書讀之如詔約束及別執手泣涕
相勉以忠義訖平劇盜實二公之力知其心不叛知其材可任然
後心不疑兵可分平生積忿知其心難也忿必見短知其材益難

也此保舉與汾陽之賢等耳年投保舉必曰彼貴我賤我降下之不宜以舊忿殺我保舉果不殺此亦人之常情也臨淮分兵詔至請死於汾陽此亦人之常情也保舉任年事出於己年且寒饑易為感動汾陽臨淮平生抗立臨淮之命出於天子摧於保舉汾陽為優此乃聖賢遲疑成敗之際也彼無他也仁義之心與雜情並植雜情勝則仁義滅仁義勝則雜情銷彼二人仁義之心既勝復資之以明故卒成功世稱周召為百代人師周公擁孺子而召公疑之以周公之聖召公之賢少事文王老佐武王能平天下周公之心召公且不知之苟有仁義之心不資以明雖召公尙爾況其下哉語曰國有一人其國不亡夫亡國非無人也丁其亡時賢人不用苟能用之一人足矣

竇烈女傳

杜牧

烈女姓竇氏小字桂娘父良建中初為汴州戶曹掾桂娘美顏色讀書甚有文李希烈破汴州使甲士至良門取桂娘以去將出門

顧其父曰慎無戚必能滅賊使大人取富貴於天子桂娘既以才色在希烈側復能巧曲取信凡希烈之密雖妻子不知者悉皆得聞希烈歸蔡州桂娘謂希烈曰忠而勇一軍莫如陳先奇其妻竇氏先奇寵且信之願得相往來以姊妹敘齒因徐說之使堅先奇之心希烈然之桂娘因以妹事先奇妻嘗問曰為賊凶殘不道遲晚必敗姊宜早圖遺種之地先奇妻然之興元元年四月希烈暴死其子不發喪欲盡誅老將校以卑少者代之計未決有獻舍桃者桂娘白希烈子請分遺先奇妻且以示無事於外因為蠟帛書曰前日已死殯在後堂欲誅大臣須自為計以朱染帛丸如含桃先奇發丸見之言於薛育育曰兩日希烈稱疾但怪樂曲雜發晝夜不絕此乃有謀未定示暇于外事不疑矣明日先奇薛育各以所部兵謀於牙門請見希烈希烈子迫出拜曰願去偽號一如李納先奇曰爾父悖逆天子有命因斬希烈及妻子函七首以獻暴其尸於市後兩月吳少誠殺先奇知桂娘謀因亦殺之請試論之

希烈負桂娘者但劫之耳希烈僭而桂娘妃復寵信之於女子心始終希烈可也此誠知所去所就逆順輕重之理明也能得希烈權也姊先奇妻智也終能滅賊不顧其私烈也六尺男子有祿位者當希烈叛與之上下者眾矣豈才力不足耶蓋義理苟至雖一女子可以有成大和元年予客遊涪陽路出荊州松滋縣攝令王淇為某言桂娘事淇年十一歲能念五經舉童子及第時年七十五尚可日記千言當建中亂希烈與李納田悅朱泚朱滔等僭詔書檄爭戰勝敗地名人名悉能記之聽說如一日前言竇良出於王氏實淇之堂姑子也

趙女傳

皮日休

趙氏女山陽之鹽山人其父質鹽盜出其息不納有司賦官捕得法當死簿已伏就死有日矣趙氏女求見鹽鐵官泣懇於庭曰某七歲而母亡蒙父私鹽官利衣食某身為生厚矣今父罪根露某當隨坐法若不可官能原乎原之不能請隨坐之法官清河崔璩

義之因為滅死論趙氏大泣曰某之身前則父所育今則官所賜願去髮學釋氏以報官德自以女子之言難信因出利刃於懷截其耳以盟必然崔益義之竟全其父命趙氏侍父刑疾愈因決歸浮屠氏舍日休曰古之救危拯禍必先示信至夫家全國完則隨而乖其盟如趙氏一乳臭女子耳繼死請父命孝也自刑以盟言信也秉孝植性高蹈於世潔乎瑾瑜不足為其真芬乎荳蘭不足為其秀與夫救危拯禍者遠矣今之士見難不立其節見安不償其信者其趙女之刑人乎噫後之修女史者幸無忘耶

書李賀小傳後

陸龜蒙

玉溪生傳李賀字長吉常時旦日出遊從小奚奴騎蹇背一古破錦囊遇有所得即書投囊中暮歸足成其文余為兒時在溧陽聞白頭書佐言孟東野貞元中以前秀才家貧受溧陽尉溧陽昔為平陵縣南五里有投金灘瀨南八里許道東有故平陵城周千餘步基趾坡陀裁高三四尺而草木勢甚盛率多大櫟合數十抱

唐文粹補遺卷二十六
巖篠蒙翳如塢如洞地窪下積水沮洳深處可活魚鼈輩大抵幽
邃岑寂氣候古澹可喜除里民樵罕外無入者東野得之忘歸或
比日或間日乘驢領小吏經驀投金渚一往至則蔭大樸隱岩篠
坐於積水之傍苦吟到日西而還爾後袞袞去曹務多弛廢令季
操下急不佳東野之爲立白上府請以假尉代東野分其俸以給
之東野竟以窮去吾聞淫畋漁者謂之暴天物天物既不可暴又
可挾搥刻削露其情狀乎使自萌卵至於槁死不能隱伏天能不
致罰耶長吉天東野窮玉溪生官不掛朝籍而死正坐是哉正坐
是哉

唐文粹補遺卷第二十六

四
完